


申

14

117



華陽宮記事

宋 蜀僧祖秀 撰

政和初天子命作壽山艮嶽於禁城之東陬詔闡人董其役舟以載石輿以輦土驅散軍萬人築岡阜高千餘仞增以太湖靈壁之石雄拔峭峙功奪天造石皆激怒抵觸若踞若齒牙角口鼻首尾爪距千態萬狀殫奇盡怪輔以蟠木瘦藤雜以楊冬對青蔭其上又隨其旋幹之勢斬石開徑憑險則設磴道飛空則架機閣仍於巔頂增高榭以冠之搜遠方珍材盡天下蠹工蠶技而經

始焉山之上下致四方珍禽奇獸動以億計猶以爲未也鑿地爲谿澗壘石爲隄埤任其石之性不加齊鑿因其餘土積而爲山山骨虩露峰棱如削飄然有雲姿鶴態曰飛來峰高於雉堞翻若長鯨腰徑百尺植梅萬本曰梅嶺接其餘岡種丹杏鴨脚曰杏岫又增土壘石閒畱隙穴以栽黃梅曰黃楊巘築備岡以植丁香積石其閒從而設險曰丁嶂又得頽石任其自然增而成山以椒蘭雜植於其上曰椒厓接眾山之末增土爲大坡徙東南側柏枝幹柔順揉之不斷枝葉紐結爲幢蓋鸞鶴

蛟龍之狀動以萬數曰龍柏循壽山之西接竹成林復開小徑至數百步竹有同本而異幹者不可紀極皆四方珍貢又雜以對青竹十居八九曰班竹麓又得紫石滑淨如削面徑數仞因而爲山貼山卓立山陰置木櫃巒頂開深池車駕臨幸則驅水工登其頂開閘注水而爲瀑布曰紫石壁又名瀑布帳從艮嶽之麓琢石爲梯石皆溫潤淨滑曰朝真磴又于州上植芳木以海棠冠之曰海棠川壽山之西別治園囿曰藥寮其宮室臺榭卓然著聞者曰瓊津殿絳霄樓萼綠華堂築臺高九仞

周覽都城近若指顧造碧虛洞天萬山環之開三洞爲
品字門以通前後苑建八角亭於其中央棖椽窗楹皆
以瑪瑙石閒之其地琢爲龍礎導景龍江東出安遠門
以備龍舟幸東西擷景二園西則溯舟造業龍門以幸
曲江池亭復自瀟湘江亭開闢通金波門北幸擷芳苑
隄外築壘衛之瀕水蒔絳桃海棠芙蓉垂楊略亡隙地
又于舊地作埜店麓治農圃開東西二關夾懸巖磴道
隘迫石多峰棱過者膽戰栗股凡自苑中登羣峰所出
入刃者此二關而已又爲勝遊六七日躍龍澗漾春波

桃華閘鴈池迷真洞其余勝迹不可殫紀工已落成上
名之曰華陽宮然華陽大氏眾山環列于其中得平蕪
數十頃以治園囿以闢宮門於西入徑廣於馳道左右
大石皆林立僅百餘株以神運昭功敷慶萬壽峰而名
之獨神運峰廣百圍高六仞錫爵盤固侯居道之中束
石爲小亭以庇之高五十尺御製記文親書建三丈碑
附于石之東南陬其旁石若羣臣入侍幃幄正容凜若
不可犯或戰栗若敬天威或奮然而趨又若僂取布危
言以示庭諍之姿其怪狀奇態娛人者多矣上旣悅之

學海類編 卷之三 遊覽
悉與賜號守吏以奎畫列於石之陽其它軒榭庭徑各有巨石棊列星布竝與賜名惟神運峰前羣石以金飾其字餘皆青黛而已此所以第其甲乙者也乃命羣峰其略曰朝日昇龍望雲生龍矯首玉龍萬壽老松棲霞捫參喊日吐月排雲衝斗靄門月窟磚螭坐師堆青凝碧金黿玉龜壘翠獨秀棲烟禪雲風門靄穴玉秀玉竇銳雲巢鳳雕琢渾成登峰日觀蓬瀛須彌老人壽星卿雲瑞靄溜玉噴玉蘊玉琢玉積玉疊玉叢秀而在于渚者曰翔鱗立津深者曰舞仙獨踞洲中者曰玉麒麟冠

于壽山曰南岍小峰而附于池上者曰伏犀怒猊儀鳳烏龍邱于沃泉上者曰畱雲宿霧又爲藏烟谷滴翠巖將雲岍積雪嶺其閒黃石竹于亭際者曰抱犢天門又有大石二枚配神運峰異其居以壓中石作亭庇之寘于環春堂者曰玉京獨秀太平巖寘于萼綠華堂者曰卿雲萬態奇峰括天下之美藏古今之勝於斯盡矣善致萬鈞之石徙百年之水者朱勔父子也善理百工之縵藝辨九州之珍產者闍人梁師成也奉人君之嗜好忽天下之安危者宰執王黼輩也靖康元年閏十一月

大梁陷都人相與排牆避虜于壽山艮嶽之巔時大雪
新邱壑林塘粲若畫本凡天下之美古今之勝在焉祖
秀周覽累日咨嗟驚嘆信天下之傑觀而天造所未盡
也明年春復遊華陽宮而民廢之矣元老大臣所以圖
詩書頌名記人厭之悉斧其碑委諸溝中至於華木竹
箭宮室臺榭尋爲民所薪同宇宙而長存獨壽山艮嶽
以耳目之眩蔽堯舜之明爲王者一尤物耳昔三代以
嬖色取禍秦隋以奢靡致失自書傳之作聖賢莫不以
斯二者爲先誠也自我藝祖以上聖之資定區宇旣克

孟昶閱宮中物有寶裝溺器遽命碎之平劉鋹廢媚川
都速禁采珠蓋奢侈者禍之媒孽創業之君所諱也於
呼富有天下美味珍服莫敢以資其身雖土階三尺茅
茨不剪亦知其可也崇甯之際恭默求治是時非無賢
能也而蔡氏先據要途祖宗之法去民久矣自是崇大
苑囿結怨敵國皆出於此不然一夫不臣天下族之彼
醜裔安得而內侮之邪噫天下之士聞壽山艮嶽者舊
矣孰親觀其興廢復使後世憑何圖記以攷之與因括
其大略作華陽宮記云

豫志

明 天台王士性恆叔著

河南諸水以河爲經附河諸郡水濟潁睢淝溱洧伊洛
澶澗俱入焉北以衛河爲輔而漳於境外合之南以
淮河爲輔而汝自境內合之然多截流橫渡而已春
夏水漲則堤岸爲魚冬水涸則沙灘成地無舟楫之
利無商賈之埠無魚鼈之生閒或有之亦不多也惟
南陽泌清諸水皆南自入漢若與中州無涉者然舟
楫商賈反因以爲利

中州山皆土壘不生草木亦不結鉗局氣行於地而不
行於山也惟崧高土皮石骨蒼翠相閒特出爲奇其
他則西南邊境處閒有青山山脈亦自西南而來下
終南歷商洛武關東則一支循伊洛龍門而行去爲
嵩山南則一支出魯山經泌陽桐柏去爲荆山直循
淮泗南行爲正幹

黃河故道由大名趨河閒往直沽入海自隋煬帝欲幸
江都龍舟十四丈汴水狹不能容乃引河入汴當時
止一時度舟計耳不意河流迅急一入不回遂爲干

百年之害蓋河北地勢高汴河身低又河南土甚疏
理任其衝突奔潰故一入不回余見世廟時有欲求
禹故道者真迂儒之言也

三門而下石磧如山連延百里河過砥柱響聲如雷漢
時轉漕關中皆繇此路不知何以挽舟而上或謂古
有月河今石磧中皆無形影可求

中州雖無山然出美石黑者如清油白者如截肪不若
江南之精理也桐柏花石更佳不減大理諸菓品味
勝爲沙土所植其田土甚寬有二畝三畝作一畝名

學海類編 卷之二
為大畝二百四十弓為小畝地廣人稀真情農也

八郡惟睢陳難治以多盜故光羅山難治以健訟故盧氏南召難治以好逋故洛中難治以豪舉故滎陽滎澤難治以衝疲故

大河南北自古為戰爭之地治平以來忘戰久矣官無一將帥民無一兵勇都閫諸職掌不過具兵備尺籍焉已民壯弓兵之設止備郡邑勾攝雖有唐汝諸守備名為防礦而麾下無一卒且白蓮教諸左道與師尚詔曹崙等往往竊發安得謂中州盡無事也若待

有事索兵則晚矣故甲午飢民之亂當事者袖手而計無出余初入省垣謂中州當立一遊擊募兵二千隨地練習以防意外譚者以為迂及陳金王自簡等變起始信余言之不誣也

四瀆惟濟水奇性喜伏流流雖伏然迅急與地上等本穿黃河截流而過又能不與河水混及其千里出地為跑突高六七尺濟源初出之處又能洄伏藏匿所浮物至年餘而出若用機者然造物之怪如是

河北三府幅員不能當一開府業已分封趙鄭二府矣

近乃又改潞府於衛輝城池既狹人烟又稀土田少沃與衡陽相去遠甚且通省建藩已至六國尙有廢府諸郡兩河民力疲於祿米之輸甚矣而諸藩供億尙爾不足諸藩惟周府最稱蕃衍郡王至四十八位宗室幾五千人以故貧無祿者不得不雜爲賤役或作爲非僻稍食祿而無力以請名封者至年六七十年猶稱乳名終其身故諸無祿庶人八口之飢饉既不免四民之生理又無望雖生於皇家適以囚禁之反不如小民之得以自活也數年之內生育愈繁不知

何以處之

中州俗淳厚質直有古風雖一時好剛而可以義感語言少有詭詐一斥破之則愧汗而不敢強辯故其俗又有告助有吃會告助者親朋或徵逋追負而貧不能辦則爲草具召諸友善者各助以數十百而脫之吃會者每會約同志十數人朔望飲於社廟各以餘錢百十交於會長蓄之以爲會中人父母棺衾緩急之備免借貸也父死子繼愈久愈蓄此二者皆善俗也

學海類編
汴城在八郡中爲繁華多妖姬麗童其人亦狡猾足使
汴城中壽山艮岳乃宋時以童貫領花石綱爲之者石
至數十丈今尺塊不存不知移於何處城外繁臺土
人念繁爲博亦未審其義所自始或云卽梁孝王平
臺又云師曠吹臺上有大禹廟貌河洛思功字然廟
貌狹不稱所以祠禹者

周公測影臺在登封五十里村中舊郟縣也對箕山許
由冢有所遺量天尺存其所豎小石碑果夏至日中
無影古云陽城天地之中然宋時測景又近汴唐顏

魯公於汝甯城北小阜立天中山碑亦謂夏至無影
周公卜洛時未有堪輿家也然聖人作事已自先具後
世堪輿之說龍門作闕伊水前朝邙山後環瀍澗內
裹大洛西來橫繞於前出自艮方嵩高爲龍左聳秦
山爲虎右伏黃河爲元武後纏四山城郭重重無空
隙余行天下郡邑未見山水整齊於此者獨南北略
淺逼耳

洛陽水土深厚葬者至四五丈而不及泉轆轤汲綆有
長十丈者然葬雖如許盜者尙能以鐵錐入而嗅之

學海類編 卷之五 遊覽
有金銀銅鐵之氣則發周秦漢王侯將相多葬北邙然古者冢墓大隧道至長里餘者明器多用金銀銅鐵今三吳所尚古董皆出於洛陽緣大冢禁於有司不得發發者其差小者耳古器惟鏡最多秦圖平面最小漢圖多海馬葡萄飛燕稍大唐圖多車輪其緣邊乃如劍脊古者殮用水銀此鏡以掩心久之屍蝕而水銀不壞則鏡收之故硃砂翡翠以年代久近爲差瓦羽觴不知其何始冢大者得百千隻以蠟色而香者爲佳若氣帶泥微青而滲酒者皆贗爲之耳郭

公磚長數尺空其中亦以甃冢壁能使千載不還於土俗傳其女能之遂殺女以祕其法今吳越稱以琴磚寶之而洛陽巨細家牆趾無不有也

洛陽住窰非必皆貧也亦非皆範磚合瓦之處遇敗冢穴其隧道門洞而居亦稱窰道旁穴土而居亦稱窰山麓穴山而栖致挖土爲重樓亦稱窰謂冬燠夏涼亦藏粟麥不壞無南方霉溼故也

陝州靈寶二城皆西北濱河南阻山東南通一線路河崖高尋丈故水不溢入城陝州城無水乃自交口引

涓涓來四十里穿城樓上過滴召公池中

自洛陽西行左秦山右邙山皆縣亘數百里直至函谷中夾線路而已邙山外則大河包之秦山後則萬山叢出故秦關百二真天險也新安縣在山上東西可二里南北僅百步自新安上山至義昌始下平坡義昌沔池所轄也過沔池至硤口又上山大抵入秦之道皆仰行孟津在邙山外止轄河坡一帶縱不過五里橫十之與新安二縣爲洛中最小而疲

衛水發源蘇門山如珠璣百萬飛躍可愛蘇門嘯臺爲

孫登阮籍也其後李之才邵堯夫輩聞風興起今皆祀之而獨不及籍豈謂籍人品在諸公下耶

曹操七十二疑冢皆聚於一處不數十里而遠今亦有沈於漳河中者陶九成曰盡掘七十二疑冢必有一冢葬君屍余謂以操之多智卽七十二冢中操屍猶不在也

函谷新舊二關舊函谷在靈寶去河岸數十里正老子騎青牛尹喜望紫氣處也新函谷在新安漢時重關內俗以爲帝里之民故徹侯不治事者謂關內侯樓

學海類編 卷之十 遊覽
船將軍楊僕伐越歸恥爲關外人乃盡獻家貲請徙
關內武帝遂爲移關於其家外以就之漢家法紀乃
至於是

洛陽舊有永甯寺後魏熙平元年靈太后胡氏所立也
中有九層浮圖架木爲之舉高九十丈有利復高十
丈合去地千尺去京師百里遙已見之初掘基至黃
泉下得金像三十軀太后以爲信法之徵是以營建
過度刹上有金寶瓶容二十五石瓶下有承露金盤
三十重周帀皆垂金鐸復有鐵鎖四道引刹向浮圖

四角鎖上亦有金鐸大小如一石甕子共一百二十
鐸浮圖四面面有三戶六窗上有五行金鈴合五千
四百枚復有金環鋪首殫土木之功繡柱金鋪駭人
心目風中聞十餘里北有佛殿形如太極中有丈八
金像一人長金像十繡珠像三織成像五奇巧冠世
僧房樓觀千閒皆雕梁粉壁青鎖綺疏異卉奇花布
滿階墀園牆皆效宮牆門效端門夾以力士金獅皆
飾金銀珠玉青槐綠水路斷飛塵時有西域沙門達
摩年百五十歲云歷游諸國此寺精麗徧閭浮所無

也極佛界亦無有此孝昌二年大風寶瓶落入地丈餘復更新之後永熙三年二月浮圖爲火所焚初起第八級中當時雷雨晦冥雜下霰雪百姓道俗觀火者悲哀振天時有三比丘赴火死經三月不滅有人入地柱火尋柱周年猶有烟氣其年五月有人從象郡來云見浮圖於海中光明奪目海上人咸觀之詳伽藍記

伏牛山在嵩縣深谷大壑之中數百里中原戰爭兵燹所不及故緇流衲子多居之加以雲水游僧動輒千

萬爲羣至其山者如入佛國唄聲梵響別自一乾坤也然其中戒律齊整佛土莊嚴打七降魔開單展鉢手持貝葉口誦彌陀六時工課行坐不輟良足以引遊方之目感檀越之心非他方刹宇可比少林則方上遊僧至者守此戒是稱禪林本寺僧則啜酒啖肉習武較藝止識拳棍不知棒喝

內召盧氏之閒多有礦徒長鎗大矢裹足纏頭專以鑿山爲業殺人爲生號毛葫蘆其技最悍其人千百爲羣以角腦束之角腦卽頭目之謂也其開採在深山

大谷之中人跡不到即今之官採亦不敢及今所採者咸近市井道路處也聞此一時貂璫以狐假虎殺人而吮其血撫按袖手而唯唯宛洛之間初至報富室以爲硿頭非厚賂不免維視礦脈則於富人墳墓掘之又非厚賂不免其借歇公寄頓官物必尋富人之莊又非厚賂不免貧人則自裹糧而執役中產則計門攤以賠稅而奏官仲春等踉蹌剝削擅逞淫刑亡論貧富人皆坐諸湯火藩司費萬金之出內帑不能得萬金之入昔人謂內帑之一金府庫之十金民

屋之百金也良然朝廷此舉聽於仲春之一言仲春之肉不足食第恐中州禍亂不知所究竟也

汝甯郡治二門兩石臺舊吳元濟牙臺也此淮蔡之地古稱亂邦險要之說不可以時平而廢府城正北突出爲半規建府治其中流汝水於下今汝齧於城之足矣決汝水逆於西門則城浸鑿河崖穴地道則半規者壞而不守非計也汝屬惟信陽據險城築於山岡之上四面皆低又澗水在前淮河在後最易守汝甯惟光州所屬光固商自爲南五縣通淮河稍集商

學海類編 卷之三
遊覽
旅聚南貨覺文物與諸縣差殊人才亦輩出光山一
薦鄉書則奴僕十百輩皆帶田產而來止聽差遣不
費衣食可怪也商城自固始分當時草草分民不分
土至今商城民住固始城中田耕於固始村內固始
亦然兩縣令常以逋逃拘集而成口語

確山南多稻田近楚俗北乃旱地漸見風塵其城四里
曾經流賊入屠之今城中民不二三百家又多縉紳
巨族女牆睥睨七百餘有城而誰與爲守且貿易店
鋪穀粟皆聚於東門之外一燎則城中坐困矣縣後

與學後又皆空地氣象蕭索余故移一集於城中空
處使人煙喧鬧以招來四方商賈且築場旣立店舍
漸興則穀粟可以次入城而此歸市之民卽守城之
眾亦以默寓百年久遠之計奈後來者不能深識余
情而遽罷之

汝甯稱殷然烟火稠薪桂是急雨雪連朝卽富室皆裂
門壁以炊朗陵近有煤山然土嫩未成余曾鑿燒之
無炤想百餘年後用物耳

汝甯本樂土癸巳甲午大荒殺人以食死屍橫道有骨

無肉汝潁城中明貨人肉以當屠肆最可恨者寶豐
楊松家有祖父其祖餓甚令松謀父烹之松遂殺父
與祖共食此亦天地之一大變也故流賊四起賊首
確山泌陽桐柏閒則陳金汝甯則王商汝潁閒則王
自簡皆號召千百人張輿蓋執干戈以叛所幸浮光
商固五州縣豐稔助亂者寡不能成大事也蓋荆山
之北汝甯之南左有金剛臺右有栲栳山皆亂民所
必資金剛臺在商城高數十里其上平原周十餘里
立營置寨足屯數千人士沃可耕路險阻不得上與

麻城天台山相爲犄角栲栳山在確山桐柏閒山高
與金剛臺同其上則連大山逶迤數百里不絕吳元
濟昔據之以得淮蔡城牆臺基闌干石址俱存俗又
稱方城山謂卽楚方城如草澤風塵二處皆當扼塞
宛洛淮汝睢陳汴衛自古爲戎馬之場勝國以來殺戮
殆盡郡邑無二百年耆舊之家除縉紳巨之室外民
閒俱不立祠堂不置宗譜爭嗣續者止以殮葬時作
佛超度所燒瘞紙姓名爲質庶民服制外同宗不相
敦睦惟以同戶當差者爲親同姓爲婚多不避忌同

宗子姓有力者蓄之爲奴此皆國初徙民實中州時各帶其五方土俗而來故也

閭閻不蓄積樂歲則盡數糶賣以飾裘馬凶年則持筐篋攜妻子逃徙趁食俗又好賭貧人得十文錢不賭不休賭盡勢必盜故盜益多且又不善盜入其家則必殺人乃所得皆重累易認之物今日所刦衣履明日卽被服之而爲人所獲故每盜或十餘人駢首就戮而計贓乃不值一金余每心憐之而無法以脫也中州僧從來不納度牒今日削髮則爲僧明日長髮則

爲民任自爲之故白蓮教一興往往千百爲羣隨入其中官府無所查覈爲盜者亦每削髮變形入比邱中事息則回無論僧行卽不飲酒食肉者百無一人

中港忽與山嶽無歸節節皆入於海今則在百歲一入
海中會於山嶽而歸節節皆入於海今則在百歲一入
海中會於山嶽而歸節節皆入於海今則在百歲一入
海中會於山嶽而歸節節皆入於海今則在百歲一入



秦錄

明 嘉興沈思孝繼山著

關中多高原橫亘大者跨數邑小者亦數十里是亦東南岡阜之類但岡阜有起伏而原無起伏惟是自高而下牽連而來傾跌而去建瓴而落拾級而登葬以四五丈不及黃泉井以數十丈方得水脈故其人稟者博大勁直而無委曲之態蓋關中土厚水深川中則土厚而水不深乃水出高原之義人性之稟多與水推移也

學海類編 卷之三
遊覽
南山謂終南山也脈自大散關而度左渭右漢黑白兩龍江注之其東出者自武功太白牽連而至商洛皆是南山如太行在燕代隨處異名耳太白極高上有積雪盛夏不消諺云武功太白去天三百山下軍行鳴鼓角則疾風暴雨立至今乃爲盜據而窟之游人莫到使山靈受汗武功亦北連太白與之竝峙太華削成四方高五千仞自回心石以上仰躡四十里少華三峰副之終南面亘藍田盩厔中對長安登者經樊川杜曲諺云城南韋杜去天尺五韋乃安石別業

杜則岐公墅而孫牧增爲者二曲爲長安林泉花竹最勝今皆荒落自此入山走深谷大壑卽三四百里不能窮中多修道求仙人數百歲者雲水游人往往覓得之子午谷去城南百里路自南通北正對長安故名然止單人獨騎可行昔魏延請孔明出軍貴妃飛騎進荔枝皆此

長安爲周秦漢隋唐所都歷代位置亦非一處然皆不出五十里之外周后稷封郃在滎城今爲武功縣其後不窋失官竄於戎狄則慶陽有不窋城公劉徙邠

學海類編 二 遊覽
繫邠州太王遷岐繫岐山至文王遷豐始近今長安之境繫鄠縣豐水出其谷焉靈臺基趾尙存又東則爲鎬水武王都鎬繫與豐東西對峙相去二十五里名宗周也諸家皆言漢武穿昆明池鎬京故基淪入于池秦始皇保西陲至非子居大邱當是畜牧之地繫今興平始皇改名廢邱示周廢不復興也孝公始作咸陽築冀闕而都焉其地九塿之南渭水之北山以南爲陽水以北爲陽故曰咸陽然史記黃圖云始皇都咸陽引清水貫都以象天漢橫橋南渡以法牽牛

則是跨渭水而都之漢長安城在龍首山上周豐鎬之東北也龍首來自樊川其初由南向北行至渭濱乃始折而東漢之未央據其折東高處爲基故宮基直出長安城上建章昆明皆在原西而秦長樂離宮漢修之亦東西峙焉其後以居母后名東朝三秦記曰此山長六十里頭入渭水尾達樊川頭高二十丈尾低可六七丈色赤漢旣據其上立未央宮矣而山勢尙東趨唐大明宮又據其趨東之壟故舍元正殿高平地四十尺也若此山方北行未東之時垂波東

下爲龍首原原有六坡象易乾卦隋包六坡爲都城
大興宮殿據第二坡應第二爻唐建都因隋無改正
易宮名太極至高宗風痺惡太極下溼遂遷據東北
山上別爲大明宮至山勢盡處引水以爲蓬萊山池
因名大興爲西內大明爲東內又於別建興慶宮爲
南內此五代都長安大略也咸陽有三秦城在本朝
縣東三十里隋城在縣東北二十里唐城在渭水北
杜郵館西鎬京東逕磁石門乃阿房之西門名卻
門冀以吸人隱刃正在鎬水入渭之處漢都長安

其城在渭之南而秦咸陽之東南也故項羽自霸上
而入秦都皆曰西上咸陽也隋都亦在長安實漢城
東南十三里今西安府坐龍首山南十里未央東南
十四里則今城正當大興舊址

長安宮殿惟秦漢最盛想當時秦壘大木多取用不盡
若今嘉靖閒午門三殿災萬歷閒慈甯乾清災動費
四五百萬金府庫不足取之事例不足又取之捐俸
不足又取之開礦一木之費輒至千金川貴山中存
者亦罕千溪萬壑出水爲難卽欲效秦漢百一未能

學海類編 卷之三 遊覽
也始舉兩朝崖略秦始皇所造宮室多在渭北每破
侯國卽放寫其宮室作之咸陽北坂上以所得美人
充之起咸陽而西至雍規恢三百里離宮別館彌山
跨谷複道相屬鍾鼓帷帳不移而具又三十五年別
度渭南立上林苑中建阿房宮東西五十步南北五
十丈上可坐萬人下建五丈旗車行酒騎行炙記其
繇亘則閣道八十里直抵驪山表南山之闕以爲塞
絡樊川爲池以木蘭爲梁以磁石爲門度魏象太極
閣道抵營室也其他葢陽棧楊平陽橐泉長楊祈年

諸宮不暇殫舉漢修長樂周二十里又起未央宮周
二十八里前殿東西五百尺深百五十丈高三百五
十尺至孝武以黃金爲壁帶文杏爲撩柱金鋪玉戶
華棖璧璫雕楹玉飾青鎖丹墀又作建章宮於宮西
跨城作飛閣構輦道以上下爲千門萬戶前殿下視
未央別作鳳闕對峙井幹樓樓閣俱高五十丈輦道
相屬焉而左鳳闕北員闕則高皆半之甘泉宮周十
九里去長安三百里望見長安他如集靈五柞回中
北宮長信不暇殫舉黃圖曰秦北至九壘南至鄠杜

東至河西西至汧渭之交東西八百里南北四百里
離宮三百相望聯屬木衣綈繡土被朱紫宮人不移
樂不改懸窮年忘歸猶不能徧漢畿千里內外宮館
一百四十五所

長安稱關中蓋東有函關西有散關南有武關北有蕭
關而長安居其中其他如大震關之在隴右瓦亭關
之在固原駱谷關之在盤屋子午關之在南山蒲津
關之在同州豹頭關之在漢中設險守國皆在名義
之內

余偕叔祥遊鴈塔問曩時曲江皆云相去僅一舍許今
遺跡第若溝渠中又無水荒烟野草一望無際所謂
江頭宮殿鎖千門者無復可求矣訊之故老亦不究
所以比閱賈氏談錄云天祐初因大風雨波濤震蕩
累日不止一夕無故而水盡竭自後宮闕成荆棘矣
今爲耕民蓄作陂塘資澆灌之用每至清明都人士
女猶有泛舟宴賞於其閒者觀此則桑田滄海當自
不虛若今日卽泛舟之處亦爲子虛烏有誰能問天
寶全勝日耶

陝田土二十九萬二千九百二十三頃八十五畝零

夏秋二稅共一百九十二萬九千五十七石 絲縣

三百六斤 絹九千二百二十一疋 縣花絨一萬

七千二百八斤 布一十二萬八千七百九十二匹

行太僕苑監所屬馬共五萬七千七百餘匹

洮州河州西甯三茶馬司課茶五萬一千三百八十

四斤漢中府屬及四川保甯府屬茶課易番馬四千

八百餘匹

稅課魚課鈔共一百七十四萬五千五百二十六貫

九百七十文零又小麥二千四百九十三石四斗

額徵工部四司銀一萬二千九百七十兩零

陝西鹽課司

領靈州一司漳縣西和二鹽井 計行

州額辦鹽小引五萬九千三百三十七引課三萬八

百五十五兩西漳二井額鹽七十一萬二百六十八

斤該銀二千五十九兩內徑解

甯夏年例銀一萬三

綏年例銀一萬三千七百十四兩零本軍門犒賞

始皇陵倚驪山下作者刑徒數萬雖其璧玉為星辰水

銀為江河金帛機械無所不備業已下錮三泉然登

陵望之正當渭水反弓之處卽以堪輿論固當二世而已

陝惟西安鳳翔二府深藏三窟自西北汧隴一窟沿邊城二窟外各鎮三窟三代前以王畿求中則居鳳翔秦漢後欲就四方則居西安自古入關有三道一自河北入爲正道項羽漢光武安祿山一自河南入爲閒道漢高祖桓溫檀道濟劉裕一自蜀入爲險道漢高祖諸葛亮關中雖號天險豈無可入之道第不比他戰場可長驅而進耳

自秦入蜀有三谷四棧道三谷者其西南曰褒谷南曰駱谷從洋入東南曰斜谷從郿入其所從皆殊舊志謂駱谷儻谷同一谷褒谷斜谷同一谷非是其棧道有四出從成和階文出者爲沓中陰平道鄧艾伐蜀由之從兩當出者爲故道漢高帝攻陳倉由之從褒鳳出者爲今連雲棧道漢王之南鄭由之從城固洋縣出者爲斜駱道武侯屯渭上由之此四道三谷者關南之險阨攻取所從來固矣語見何仲默三秦志中然志稱同一谷者謂褒城谷北口曰斜南口曰褒

學海類編 卷之八
洋縣谷南曰曰儻北口曰駱

華山與長河會處在潼關然河之南須得河南府新安河之北須得山西平陽府平陽南有東烏嶺北有冷泉關蓋河之南無新安則由沙澗可渡河至蒲州河之北無平陽則由烏嶺冷泉入平陽至蒲州至龍門兩岸平廣可渡者百里故在古人秦有函關陝西統平陽也

延慶平涼民悍勇若邊患臨鞏鄰接羌番鳳沔復多回種幸羌人作茶利閉關絕市可制死命然河套失守

莊浪弃地三邊懸隔

南山東西通接商洛汝鄧漢鳳襄沔山深谷密縣亘數千里內多巖洞盜易潛匿宜預搜索

靈韋甯夏之接蘭州河洮之接古浪涼州之接上郡北地安定三郡土廣人稀饒穀多蓄

關中郡邑最遠者如鞏昌府成縣去府東南六百里兩當縣去府東五百六十里階州去府南八百里皆白馬氏所居武都故地延安府葭州去府六百里神木縣去府九百里府谷去府東北千一百里皆周環河

套之內

余行漢中過禹廟問漢源因見大安河自略陽來其流
尤大不知當時何以表漾爲源也心疑之及讀丹鉛
總錄始知有東西漢焉今引而記之總錄祝穆曰天
下之大川以漢名者二班固謂之東漢西漢而黎州
之漢水源於飛越嶺者不與焉固之所謂東漢則禹
貢之道漾自嶓冢山逕梁洋金房均襄郢復至漢陽
入江者也西漢則蘇代所謂漢中之甲輕舟出於巴
乘夏水下漢四日而至五瀦者其源出於西河州徼

外經階沔與嘉陵水合俗謂之西漢又經大安利劍
果合與浩水合入於江

藍田關卽秦嶢關圖七賢過關者卽此蓋是春雷初霽
張說張九齡李頎李白鄭虔孟浩然共訪輞川王維
也當時鄭廣文自爲圖有詩曰二李才名壓二張歸
鞭遙指孟襄陽

澄城縣山崩初爲一山至是東西分馳三四里遺捨平
陷良爲一奇此嘉靖丁未六月也唐武后臨潼縣因
風雷湧出一山初高六尺漸高至二丈因名慶山以

此知古稱穀洛水鬪信乎不誣宋紹興十四年亦有
樂平水鬪有司奏言河衝里田水中類爲物所吸聚
爲一直行高平地數尺不假堤防而水自行里南程
氏家井水溢亦高數尺夭矯如長虹聲如雷穿壁破
樓二水鬪於杉墩且前且卻十餘刻乃解正德中又
有文安縣水忽僵立是日天大寒遂凍爲冰柱高五
丈四圍亦如之中空而榜有穴後數日流賊過人多
避其中山川且然况人物乎以是知造物之奇無所
不有

慶陽緣邊人善蠱術有爲稻田蠱者能使其人腹中有
土一塊中出稻芒穿腸而死樹蠱者則出樹枝撐腸
是亦挑生之類然則是術不獨粵中有之

寶雞以西蓋屋成以板用石壓之小戎曰在其板屋自
古西戎之俗然也此地流渠走水依稀江南在關中
稱沃土

自古稱棧道險今殊不然屢年修砌可竝行二轎四馬
其褻斜二谷俯黑龍江咸乾灘亂石不知漢張湯何
以欲轉漕於渭豈古今陵谷星淵至是其站皆軍夫

以百兵爲殿置是軍無餼廩惟自種山田數畝而已
今軍日消而往來之絡繹如故是宜有以處之入川
如秋林富村古店諸站丁庶而富其氣象又與漢中
別

會甯鮮流水源泉土厚脈沈泥淖斥鹵卽鑿井極深亦
不能寒冽居民夏惟儲雨水冬惟窖雪水而飲峨眉
太岳頂上無水亦然

大隴首山牽連六七百里其上多鸚鵡行人過此困頓
欲絕故樂府曰隴頭流水鳴聲嗚咽遙望秦川肝腸

斷絕崆峒山有元鶴洞深無底中有三元鶴時出飛
翔雲際遊者見之以爲瑞鳥鼠同穴山則飛走相爲
牝牡此最異事鳥曰餘鼠曰鼯

無定河河名也此地浮沙善陷與人急走急換足不則
陷矣故名

甘涼處原中國地晉涼州志云周衰其地爲狄後匈奴
使休屠渾邪等王王月支以地降漢漢置張掖酒泉
燉煌武威金城謂之河西五郡南隔距羌而斷匈奴
右臂以通西域故張騫通三十六國班超復定五十

學海類編 卷一百一十五
餘國條支安息至於海濱四萬里外魏晉後通者不
過二三國耳古燉煌今嘉峪外地也卽晉之西海郡
居延等縣元爲亦集乃城蓋在肅州東北五百里瓜
州蓋在今肅州衛西五百里卽古西戎地漢爲玉門
關沙州城蓋在衛西八百里漢月支地漢又有龍勒
縣卽壽昌地亦卽唐陽關西北去又數百里爲伊州
桑遠縣又西去數百里爲蒲昌縣又北去數百里爲
唐安西府交河縣其地又遠而太宗所置伊西庭州
高宗所置龜茲于闐四鎮總之在玉門之外而天寶

以後河西隴右始陷吐蕃耳本朝守嘉峪棄玉門以
外大都甘州西去五百里爲肅州漢酒泉都肅州不
及百里卽嘉峪若河西諸郡皆在甘州行都司之內
甘州卽漢張掖如甘州東北百二十里爲山丹亦張
掖地東五百里爲鎮番東南三百里爲永昌五百里
爲涼州南九百里爲莊浪皆漢武威東南一千三百
里爲西甯乃古湟中卽漢破羌縣屬金城郡古賢如
張奐張芝索靖索綝父子咸燉煌人

涼州稱涼者以西北風氣最寒而名也五六月白日中

學海類編 卷之三 遊覽
如雪皚皚而下者謂之明霜

河套雖古朔方之地但漢唐來棄之已久起甯夏至黃甫川黃河北遶二千五百里卽南自川至定邊亦一千三百里以圍徑求之當得縱橫各一千二百里餘其中皆蕪野荒原惟鹵可就水草住牧安得中國人居之卽遷人實之從何得室廬耕作所謂得其地不足田得其人不足守幸而會議不成耳卽成費國家金錢數百萬取之終亦必棄爲鹵復得惟是銑出身任事之臣一旦爲奸臣所搆陷身首異處不能不令

志士髮上指冠也

固原本稱腹裏宏治中因火節入寇適當其衝始改縣爲州卽州治爲鎮城以固靖蘭等衛隸之與甯夏相脣齒稱重鎮焉鎮迢遞千餘里地當四衝賓免諸酋及海濱生番諸部迭出剽侵不能制禦自臨洮設而西無海寇之虞聲援易及自松山復而北無靖邊之警城堡相聯藩籬旣固堂奧漸安矣東起蘆溝抵甯夏石空寺界西至靖邊抵臨洮蘭州會甯界新疆東北大小蘆城塘抵臨洮三眼井界

臨洮衛舊屬固原鎮筦長難及萬歷二十三年始設專鎮蘭河洮岷階文成隸之又拓松山地三百餘里屯戍相望爲金城以南保障東自會甯抵固原靖邊界西自宏化寺抵甘肅鎮莊浪界迤北至松山永泰川邊牆迤南由黑城子洮民二衛抵四川松茂界延綏舊治綏德撥千戶屯治榆林附近諸衛所官軍輪班哨守成化初設榆林衛余都御史子浚復廣衛城增東西中三路營堡塹山堙谷另爲一邊因移鎮爲東連牛心之堡西截河套之衝包收米脂魚河一帶

地三百里柘王旣多控扼亦要鎮東由黃甫川至定邊營接甯夏之花馬池計一千二百里花馬池北抵橫城三百二十里橫城亦甯夏堡也而達諸黃甫川則本鎮邊境共長一千五百二十里皆在黃河之內邊牆外悉屬河套

甯夏邊境東接延綏西抵固原計一千八百餘里絲橫城堡渡河而西是爲鎮城絲鎮城之鎮遠關二百四十里中衛四百里是在黃河之外賀蘭紆迴繞之山之後皆住牧又絲鎮城渡河而東則入靈州以至

韋州三百四十里韋州南接固原之預望城又在黃河之內矣黃河東自臨洮府蘭州經中衛南過峽口一百里峽口距鎮城四十里兩山相夾河經其中塞北一勝槩也河東修設始於巡撫徐廷璋而楊一清王瓊唐龍增築花馬池一帶邊牆鹽川東西三百餘里藉保障焉

甘肅鎮所轄漢河西郡地也國初定河西棄燉煌畫嘉峪關爲界自莊浪歧而南三百餘里爲煌中地置西甯衛自涼州歧而北二百餘里爲姑臧地置鎮番衛

又設甘州等五衛於張掖設肅州衛於酒泉蘭州衛於金城皆屯兵拒守全鎮幾二千里惟一線通道西控西域南蔽羌戎北捍胡稱孤懸重鎮云東自松疆阿霸嶺抵臨洮雙墩子界西至嘉峪關邊長一千八百餘里境外北有松流瓦刺南有火永海阿歹諸酋及諸番住牧

松山東抵黃河北抵賀蘭西亘莊浪南綴蘭靖延袤千里國初置郡隔絕胡翼護羌夷實斷匈奴右臂自款市招引賓酋盤窟其中棄我三層墩臺就近築邊

莊浪僅成一線萬歷二十六年出兵恢復割大小葫蘆塘等處屬固原紅水河三眼井等處屬洮岷阿霸嶺大靖域土門兒等處屬甘肅白黃河索橋至土門長四百餘里而蘭靖莊涼俱稱內地云

晉錄

明 嘉興沈思孝繼山著

山西田土三十六萬八千三十九頃二十七畝零 夏
 秋二稅共二百七十二萬四千二十二石 絲五千
 斤 絹四千七百七十七匹 稅課四十四萬七千
 六十四貫七百九十文 額解太倉銀六百七十七
 兩六錢 額徵工部四司銀一十萬九千九百五十
 二兩四錢綾絹一千匹

河東鹽運司

額解池東場西場中場三分司
 歸德

懷慶 汝甯 南陽 汝州 平陽 潞安 澤

額辦小引鹽四十二萬引 餘銀解太倉一千四十七兩一錢解

宣大山西三鎮年例十二萬四千九百三十二兩
代府祿糧四萬三千一百十三兩零 本布政司抵
補民糧七萬四千
二百五十九兩

山西號為內地然自 據東勝而甯鴈衝據河套而偏老震甯鴈入則由代岢而下偏老震則由保河深入於是三關之防重矣偏頭關設在保德州迤北西鄰延綏河套東連大同朔漠北衝東勝一帶甯武關設在朔州西南其地名野豬溝搭達木河等處俱在關

西北相去一百六十里與偏頭關老營堡地方聯絡緊接煖會口要路鴈門關設於代州西抵甯武偏頭東連紫荆倒馬逼近朔州威遠地之要害三關相為甲乙而甯武據鴈偏兩關之中為東西應援外接入角堡內維岢嵐尤為緊關故總兵初治偏關後移鎮於此東起北樓口抵大同井硤界西至娘娘灘過河抵延綏黃甫川界邊長二百餘里

山西地高燥人家蓋藏多以土窖穀粟入窖經年如新蓋土厚水深不若江南過夕即沓爛惟隔歲開窖避

其窖頭氣一時刻卒然遇之多殺人其窖地非但蓋藏粟亦以避虜人遇窖不敢入惟積草薰之然多其歧竇卽熏烟有他竅出不爲害第家家穿地道又穿之每每長里餘嘗與他家穿處相遇江南洞在地上皆天生塞北洞在地下皆人造

國初設大同府分封代王外分東中西三路北設二邊蓋虜南犯朔應諸城要路也東則天城陽和爲虜入順聖諸處之衝自北二邊壞虜遂直抵鎮城是以總制毛伯溫設法修復五堡曰宏賜曰鎮川曰鎮邊曰

鎮山曰鎮河其地皆在舊二邊之內去鎮城十里各添設守備而宏賜堡居中復添設參將屯兵戍守始不敢輕犯其境東連諸胡西接套東起天城抵宣府鎮西陽和界西至井陘抵山西北樓口邊長六百四十餘里

魏王盛兵蒲坂

平陽府蒲縣

以塞臨晉

縣屬蒲州

韓信爲疑兵陳

船欲渡臨晉而伏兵從夏陽

西安府韓城縣

以木罌渡軍襲

之

黃河自西安府入本省界經大同府境入太原之保德

岢嵐州興縣又經永甯州甯鄉縣至平陽府永和大甯吉州河津滎河達蒲州蒲在河之東從此歷芮城平陸垣曲經陝之潼關始入河南界

晉中俗儉朴古稱有唐虞夏之風百金之家夏無布帽千金之家冬無長衣萬金之家食無兼味飯以棗故其齒多黃食用羊故其體多肉其朔風高厲故其色多黯黑而少紅顏白晳之徒其水泉深厚故其力多堅勁而少溼鬱微腫之疾地有洞故其虜至可避商有件故其居積能饒惟五六月歎暑炎爍之時日則

捉扇而搖夜仍燒炕而睡此不可以理詰也

平陽澤潞豪商大賈甲天下非數十萬不稱富其居室之法善也其人以行止相高其合夥而商者名曰夥計一人出本眾夥共而商之雖不誓而無私藏祖父或以子母息勾貸於人而道亡貸者業捨之數十年矣子孫生而有知更焦勞強作以還其貸則他大有居積者爭欲得斯人以爲夥計謂其不忘死肯背生也則斯人輸少息於前而獲大利於後故有本無本者咸得以爲生且富者蓄藏不於家而盡散之爲夥

學海類編 卷之四 遊覽
計估人產者但數其大小夥計若干則數十百萬產可屈指矣所以富者不能遽貧貧者可以立富其居室善而行止勝也

蒲解皆平陽名郡論州治則解不及蒲論屬邑則蒲不及解

河曲之地取義於黃河一曲也宋時爲火山軍以其地有火山巖石隙縫處烟氣迸出役之竹皮木屑則焦炭之以鬲釜水米則熟其下似一團純火而山仍有草木根株不灼事理之甚奇者

沁水出沁州沁源縣山之東谷經岳陽澤州穿太行出覃懷入黃河狐首諸經云界水則止太行縣巨龐厚非一水所能界故桑乾滹沱清濁漳皆穿太行而東當黃淮汎濫時當事者欲引沁水入衛以分河勢不知河入中國受涇渭澠浴汴泗諸水非沁一水之能分其勢也且沁出太行而南皆山麓險阻不能引而之衛若沁可入衛則河復禹故道當不難矣諸葛孔明曰識時務者在俊傑

太原縣十里晉祠蓋以祀唐叔而中有元君廟泉出其

下匯而爲池又前行數十步流漸盛東西分注太原
清源二邑實賴之水淵泓澄徹爲晉中勝景其西爲
奉聖寺初不詳所始後得王明甫方伯碑文讀之乃
知爲唐鄂公尉遲敬德所建鄂公英姿颯爽驍勇絕
倫文皇創造戰功當爲第一晚乃悔悟前非棲心三
寶遂建刹并州之南疏請臨軒敕名奉聖銷鷲氣以
慈航斂雄風於寂境蓋異人天資朗徹故能超出塵
網完保榮名視信越諸人霄壤懸絕雖曰主德克終
抑亦自全有道矣韓蘄王初不知書晚解兵柄策蹇

驢西湖山水閒時作小詞默契禪理與此頗相類豈
俗所云大富貴者多自修行中來耶

大同右衛軍馬坤女年十七將適人化爲男子嘉靖戊
申七月也後隆慶閒有李良雨者又化爲婦人婦妝
見客不羞今萬歷閒又有儀賓生兒之異比聞之乃
一神托胎於其腹中臨產輒自言欲脅出其人懼求
從穀道神嫌穢不肯再三求之請以香水數斛澡之
乃從澡畢遂滅形不知去向

路安府長子縣城堯長子丹朱築也故以名縣縣去府

治僅三十里又當孔道車馬往來絡繹縣衙素有怪
每中夜若衣冠出遊者或時至公堂胥吏輩羣然走
避之以爲常近已絕矣

三受降城東城在廢東勝州北今朔州西北四百里漢
雲中郡中城在今大同郡城西北五百里東去東城
三百里漢九源縣西城在古豐東北八十里三城皆
唐張仁愿所築以受北地之降人者也西城開元圮
於河別置河東寶歷初又徙東城於綏遠峰南中城
遼元置州縣今三城皆不守而邱富趙全等乃道俺

答爲板升以受中國之降人據之板升眾可十餘萬
中國百工技藝無所不有趙全已爲俺答造宮殿乃
入住之日忽梁折俺答疑終身不敢入宮室仍舊守
水草住牧全雖服上刑他日邊塞之禍終潰於此蓋
南有香山北有板升此寇之所必資也

晉俗勤儉善殖利於外卽牧畜亦藉之外省余過朗陵
見羊羣過者羣動以千計止二三人執筆隨之或二
三羣一時相值皆各認其羣而不相亂夜則以一木
架令跳而數之妓婦與肩酒殽者日隨行剪毛以酬

問之則皆山以西人冬月草枯則麾羊而南隨地就
牧直至楚中洞庭諸湖左右澤藪度歲春深而回每
百羊息羔若干剪毛若干餘則牧者自得之

楚書

明 繡水陶晉英若英著

曩年在楚雖侍親官署嘗得步履郊野閒奉嚴命祇
役湖南北諸郡尋山問水興會殊佳追憶舊遊錄成
斯帙漫無編次其曰楚書者乃書所見聞之書匪冒
古楚書名也崇禎辛巳仲春下浣之五日

湖廣在春秋戰國閒稱六千里大楚跨淮汝而北之將
及河本朝分省亦惟楚爲大其轄至十五郡如鄖之
房竹山荆之歸巴東與施永偏橋清浪等衛所動數

學海類編
千里入省逾月文移之往復彝情之緩急皆所不便而辰永督學屢合屢分鄖沅開府或罷或興黎平生儒此考彼試種種非一况貴竹粵西兩省雜以猺獞彝苗主以衛所閒以上會咸不成省院司以官至者人我咸鄙夷之謂當以辰州沅州靖州分屬貴陽永州寶慶郴州分屬粵西則十三省大小適均民彝事體俱便

三湘總之一湘江也其源始海陽而北入洞庭其流過水而瀟水入之是謂瀟湘過衡而蒸水入之是謂蒸

湘過常而沅水入之是謂沅湘湘江其初最清百尺而毛髮可鑑比會眾流下洞庭始濁湘君湘夫人古今以堯女舜妃當之唐人用以爲怨思之詩然計舜三十登庸釐降二女于瀉汭卽年二十而舜以百十歲崩蒼梧二女亦皆百歲人矣黃陵啼鵲湘妃竹淚至今以爲口實可笑也

禹貢九江孔殷釋之者云卽洞庭也沅漸元辰瀘西豐資湘九水皆合於此故名九江又九江沅澧湘最大皆自南而入荆江自北而過洞庭瀦其閒名五瀦戰

學海類編 卷之二 遊覽
國策云秦與荆戰大破之取洞庭五瀦是也每歲六
七月閒岷峨雪消江水暴漲自荆江逆入洞庭清流
爲之改色

楚有四樓仲宣樓在當陽城上倚曲沮夾清漳今荊州
城上樓乃五代高季興建望沙樓故址也宋陳堯咨
更令名晴川樓南對黃鶴從武昌望之佳黃鶴以製
勝如蓮瓣垂垂洲渚掩映岳陽以境勝八百里洞庭
一髮君山眼界奇絕總之岳陽爲上黃鶴次之晴川
仲宣又次之

武當謂山阜高大非元武不足以當之今其巨坡造天
危巒逼漢良然然自天柱而外則別無奇詭之觀徒
土木之偉麗爾當文皇造五宮時用南五省之賦作
之十四年而成此殆不可以萬萬計者當時勝國府
庫積蓄既多而五嶺九邊咸無兵餉歲例之費今日
國家財力何能爾爾

志稱黃鶴樓在府城西南隅黃鶴磯上世傳仙人子安
乘黃鶴過此又云費文禕登仙駕黃鶴返憩於此唐
閣伯程作記以文禕事爲信或者又引梁任昉記謂

駕黃鶴之賓乃苟環字叔禕非文禕也宋張栻亦辯其非

洞庭水淺止是面闊括風驚濤輒浪帆檣易覆故人多畏之湖中有數蛟有喜食糝砂者遇舟中攜糝物過出而奪之有喜食硃砂者遇舟中攜硃砂過出而奪之奪則濤興浪起或危舟楫齎此物者或重裹以犬羊之鞢余以端午過洞庭風浪大作時兒女或以硃塗砂耳鼻者舟人亦請棄之余笑謂老蛟乃竊此分文之餘乎已而風息類藉口如是

洞庭水漲延袤八百里盜賊竊發乃於岳州立上江防

兵備轄三哨官兵追治之上哨自岳州府南津港至長沙湘陰縣哨約三百餘里南接蒼梧北達荆郢東會漢沔爲洞庭左臂哨內小巡把總一哨官鹿角磊石穴子湘陰哨四巡簡鹿角營田各一信地兵船自

府五里至南津港里五荆埠港里十五河公廟里二十新牆

河口里十五萬石湖里六鹿角里二十啄鉤嘴里二十磊石里十五

里鯽魚夾里十五青草港里十顏公埠里十五穴子哨里十五

白魚圻里十五營田司里二十大頭寨里五橫嶺里十五蘆林

潭水退各船分移於扁山高沙洲沈沙港蘆林潭等
 地中哨自君山後湖至常德傅家圻三百六十餘里
 西北通巫峽西抵辰沅東南極瀟湘為洞庭右臂哨
 內小巡抱總一哨官明山一巡商古樓一信地兵船
 自君山後湖五十里蓼荊灣過洞庭大湖至昌蒲台十五里
 昌蒲台內七十里石門山迤西六十里白茆磯迤北十五里
 傅家圻自昌蒲外迤東八十里團山二十里吉山十五里
 古樓三十里明山水退分移布袋口洞庭夾白水夾上
 下井灘等信地下哨長江一帶自岳州至嘉魚界墩

子口約三百餘里南吞七澤北迎湘郢東聯潯黃西
 接三巴為洞庭咽喉哨內小巡百戶一哨官茅埠竹
 林各一巡簡黃家瓦子城陵白螺鴨欄茅鎮石須共
 七信地兵船過江北岸四十里瓦子灣二十里藤站湖十五里
 鹽船套二十里楊圻腦二十里黃家穴六十里上茅灣六十里
 西江嘴西岸流水口四十里白螺磯三十里楊林山
 白螺山三十里王家保二十里新堤口十里茅埠鎮三十里
 烏林磯十五里竹林灣十五里杜家洲五里紀家洲東岸
 域陵司五里團山磯十五里象骨港二十里道人磯三十里青

江口

十五里

高家墩

三十里

石頭口

十五里

六溪口

十五里

邱

公灣

十里

墩子口

十里

嘉魚縣此萬歷乙酉馮仁軒露備

兵岳州時刻圖

古今譚形勝者皆云關中爲上荆襄爲次建康爲下以今形勝則襄陽似與建康對峙者建康東南皆山西北皆水襄陽西南皆山東北皆水以勢則襄山據險而建山無險以勝則江水逆來而漢水順去故論荆襄則襄不及荆其規模大而要害攬也荆州面施黔背襄漢西控巴峽東連鄢郢環列重山襟帶大江據

上游之雄介重湖之尾爲四集之地蜀漢據而失之驍將旣折重地授人僻在一偏不卜而知其土業之難成也

江陵作相九列公卿半繫楚人如呂相國調陽方司馬逢時李司空幼滋曾司空省吾劉司寇一儒王少宰篆謝司徒鵬舉陳宗伯恩育汪冢宰宗伊各據要路其後吳相繼之則許相國國王相國錫爵徐宗伯學謨姜宗伯寶顧司馬章志方司徒宏靜王司寇世貞王御史大夫樵趙少宰用賢程司徒嗣功顧司馬養

謙今則豫章漸盛哀御史大夫貞吉蔡豕宰國珍徐
司空作鄧少宰以讚范宗伯謙董司空裕雖其閒彈
冠引兌賢不肖人人殊然偶一宰執起則公卿相隨
而出亦關此方氣運地脈一時之盛也

襄陽夙稱多耆舊古蹟余曾有弔襄文如大堤古築之
以捍漢水者也後遂爲遊樂之地男女踏歌樂府有
大堤曲曰漢水橫襄陽花開大堤煖曰大堤諸女兒
花豔驚郎日西北二十里隆中山諸葛孔明隱處棗
陽有南陽城想所云躬耕南陽卽此非宛中之南陽

也城南峴山羊叔子所登而嘆其云自有宇宙便有
茲山由來賢哲登此者多矣而皆湮沒無聞此語千
古悲咽祜沒襄人感之爲立碑流涕名峴山墮淚碑
山畔習家池後漢習郁依范蠡養魚法穿之謂其子
曰必葬我近魚池後山簡鎮襄愛之輒游池上醉而
名之曰高陽池詩稱倒著白接羅酩酊還騎馬者是
峴山又有杜甫故宅習池亦有王粲井甫詩云清思
漢水上涼憶峴山顛吾家碑不昧上氏井依然城西
十里萬山乃鄭交甫所見遊女爲解珮處云此山之

曲隈也山下有萬山潭晉杜預伐吳勒碑紀功一置萬山之上置茲潭之下云他日恐深谷爲陵也唐鮑溶詩云襄陽太守沈碑意身後身前幾年事漢江千古未爲陵水底魚龍應識字府西北爲夫人城昔朱序鎮襄陽苻堅圍之序母韓氏謂城西北必壞領百餘婢增築二十丈賊果潰西北眾守新城而退名夫人城東南三十里鹿門山龐德公隱居其上劉景升所過而歎異之者其後居士龐蘊復居之男女不婚嫁共學無生白日坐化其後孟浩然復來居之府

治西文選樓梁昭明太子聚賢士劉孝威庾肩吾徐昉江伯操孔敬通惠子悅徐陵王囿孔樂鮑至等十餘人號高齊學士著文選於此郡北樊城隔漢江與襄陽對峙周仲山甫所封關公圍曹仁於樊城北沔水有斬蛟渚乃襄陽鄧遐揮劍處人知斬蛟有澹臺周處而不知有遐又有楚昭王莊王淳于髡黃憲劉表等墓鄴鄩春陵等城其人又有尹伯奇卞和司馬德操張柬之杜審言皮日休諸人

斬黃之閒近日人文颯發泉湧然士風與古漸遠好習

權奇以曠達爲高繩墨爲恥蓋有東晉之風焉然其一段精光亦自鏟埋不得毋論士大夫卽女郎多有能詩文者如周元孚董夫人輩又毋論詩文近且比丘尼輩出高譚禪理如所云澹然明因自信等余蓋於李卓吾八觀音問中崖略見之李以菩薩身自任蹤跡太奇其與耿司寇以學問相傾不啻剗刃

斲竹爲器抽削如絲纖巧甲於天下復有斲艾斲龜斲蛇艾則惟荆王府內片地出者佳然不多得蛇與龜皆生於他鄉村蛇則頭有方勝尾有指甲兩目如生

自剗腸盤屈而死者可已大風龜則背有綠毛可辟蠅蟲置之書篋數年不死然多贗者以小龜塗馬矢放陰溝中綠毛自生攜出者不久卽落也竹則以色瑩者可簞節疏者可笛帶鬚者可杖

赤壁山一統志云在江夏東南九十里唐元和志亦稱在蒲圻縣西一百二十里北岸烏村與赤壁相對卽周瑜焚曹操處圖經乃謂在嘉魚縣西七十里至宋蘇軾又指黃州赤鼻山爲赤壁蓋劉備居樊口進兵逆操遇於赤壁則赤壁當在樊口之上又赤壁初戰

操軍不利引次江北則赤壁當在江南今江漢閒言赤壁者五漢陽漢川黃州嘉魚江夏惟江夏之說合於史

衡山禹碑唐劉禹錫韓昌黎皆有詩北宋朱晦翁張南軒至衡岳尋訪不獲其後晦翁作韓文考異遂謂退之詩爲傳聞之誤蓋以耳目所限爲斷也王象之輿地紀勝云禹刻在岫嶁峰又傳在衡山雲密峰昔樵人曾見之自後無有見者宋嘉定中蜀士因樵人引至其所以紙搨七十二字刻於夔門觀中後俱亡近

有獲於嶽麓書院者斯文顯晦信有神物護持其文承帝曰嗟至竄舞永奔實七十七字云二誤也

九疑山乃南龍大幹行龍之地其峰有九參差互映望而疑之故名九疑蓋山有九水四水陽流注於南海五水陰流注於洞庭五水者瀟湘舜源水澠水砭水等也九峰謂朱明石城石樓娥皇女英舜源蕭韶桂林杞林大舜陵在其中太史公所謂舜崩蒼梧之野葬於零陵之九疑者是也今不知其處惟於蕭韶峰下立廟祭之秦皇漢武皆以道阻不得過江漢而望

學海類編
祭焉宋置陵戶禁樵採

宜章登舟卽古所稱瀧水兩崖成石頗似巴江以其形似龍然故稱瀧然水小而險最善壞舟不數日而達廣之韶其勢甚速然僅可用舢艚力不能載十石不若蜀舟之大也韓文公入潮陽由此

永近粵鄉村閒稍雜以彝獠之俗男子衣裙曳地婦女裙袴反至膝止露髀跣足不避穢污著草履者其上也首則飾以高髻耳垂大環鑄錫成花滿頭插戴一路鋪遞阜快與夫馬卒之徒皆以婦代男爲之致男

女混雜戲劇官不能禁

長沙卑溼賈生賦鵬以死古今一詞余過其地見長沙雖溼非卑而涇也蓋猶在洞庭上流岳渚漢陽尙在其下安言卑也惟諸郡土皆黑壤而長沙獨黃土其性粘密不滲故溼氣凝聚之深誼洛陽人故不宜也卑溼之地當以閩廣爲最漳泉葬者若全棺入地則爲水所宿番禺江一日兩潮汐至蒼梧其地下可知辰州在五溪二酉之間蓋漢五溪蠻地亦曰武陵蠻謂武陵有五溪雄溪楠溪酉溪漚溪辰溪俱在今盧溪

縣轄馬伏波所征其稱上潦下溼視飛鳶跼跼墮水中思少游語卽此余行其地登水邊石洞數處咸云伏波避暑洞當時謠云鳥飛不度兮獸不能臨嗟哉武溪何毒淫也由辰溪八十里卽大酉云黃帝藏書處黔中他洞皆溼惟大酉獨乾潔遠望洞口石脊亦似橋山小酉在貴竹西陽

鄖地介河南湖廣陝西四川四省山谷隄塞林箐蒙密旣多曠土又有草木可採掘而食自古爲逋流之地國初鄧愈勦除之空其地禁流民不得入天順中歲

飢民又徙入不能禁至成化元年亂乃生劉千斤挾石和尚僭號改元遣尙書白圭討平之未幾餘孽李鬚子又亂再遣項忠忠乃招諭捕發還鄉者百四十萬編戍者萬人然後擊殺李鬚子十二年流民復集都御史李賓恐逐之生亂請因而撫定之使占籍以實襄鄧戶口乃命副都原傑往籍流民得十一萬三千戶遣歸者一萬六千餘願畱者籍之改鄖縣爲郡治以開府至今乃安高岱謂項忠之盪定乃一時之功原傑之經略則百世之利

黎平府立於湖廣五開衛之中原爲大牙相制之意雖其壤接平溪然彝箐難行其路復出楚中旣過沅州則皆楚地復經黔陽會同靖州銅鼓四五百里方至過他省而抵巴郡毋論窻遠如事體何又青衿子弟由楚督學選就試方入貴試院舊時貴院於黎平士子有暗記如兩都監生例及乙酉遣京官主考硃卷無識遂至一榜中黎平十人已占貴三之一貴士遂鬨然不欲黎士就貴試此於彝情士習官體文移均屬未妥

施州保靖永順正當海內山川土宇之中反爲槃瓠種類盤踞施州東抵巴東五百里西抵酉陽九百里南抵安定碕北抵石柱司各七百里依稀閩浙全省地而永順東西南北咸徑六百里保靖東西亦五百里南北半之其俗男不裹頭女衣花布親喪打葬就日而埋疾病則擊銅鼓沙鑼以祀鬼神居常則漁獵腥羶刀耕火種而食不識文字刻木爲契短裙椎髻常帶刀弩爲威其人雜彝獠不可施以漢法故歷代止羈縻之本朝籠以衛所土司有事調之則從征逮之

學海類編 卷之三 遊覽
則不至南去爲辰州又南爲柳慶族皆其種俗亦近
之秦漢所稱黔中之地然辰以南屢經征伐其人遂
分彝漢彝者統以土司漢者治以有司不若施永之
一槩羈縻也然雖漢人漢法之處其城市者衣服言
語皆華人而山谷閒亦頗雜以獠俗不盡純也

楚中與川中均有採木之役實非楚蜀產也皆產於貴
竹深山大壟中耳貴竹乏有司開採故其役耑委楚
蜀兩省木非難而採難伐非難而出難木值百金採
之亦費百金值千金採之亦費千金上下山坡大澗

深坑根株旣長轉動不易遇坑坎處必假他木抓搭
鷹架使與山平然後可出一木下山常損數命直至
水濱方了山中之事而採取之官風餐露宿日夕山
中或止一歲半年及其水行大木有神浮沈遲速多
有影響非尋常所可測

天生枏木似耑供殿庭楹棟之用凡木多困輪盤屈枝
葉扶疏非杉枏不能樹樹皆直雖美杉亦皆下豐上
銳頂踵殊科惟枏木十數丈餘旣高且直又其木下
不生枝止到木顛方散榦布葉如撐傘然根大二丈

則項亦二丈之亞上下相齊不甚大小故生時軀貌雖惡最中大厦尺度之用非殿庭真不足以盡其材也其大者既備官家之採其小者土商用以開板造船載負至吳中則折船板吳中折取以爲他物料力堅理膩質輕性爽不澀斧斤最宜磨琢故近日吳中器具皆用之此名香楠又一種名鬪柏楠亦名豆瓣楠剖削而水磨之片片花紋美者如畫其香特甚熱之亦沈速之次又一種名瘦木徧地皆花如織錦然多圓紋濃淡可挹香又過之此皆聚於辰州或云此

一枏也樹高根深入地丈餘其老根旋花則爲瘦木其入地一節則爲豆瓣枏其在地上者則爲香枏

楚本澤國最稱多魚淮揚吳越之地未嘗非水鄉然未若長沙武陵之間魚可以澤量者亦地產異也大江上下則美鱒鯉然此魚雖佳而最醜惡如身長五尺則鼻亦四尺餘惟鼻長故口在鼻下如在腰閒魚鰕遇輒避苦不得食每仰游開口接而食之今所造鮓硬骨而適口者卽鼻肉也而鼻善痛稍觸之則徹骨不禁而魚鼻長又善觸故遊必鼻向上尾向下又不

敢近岸畏崖石取者探其情極易得之此種爲江魚可網不可畜其鬻種於吳越閒者爲鱧魚最易長然不種子或云楚人來鬻者先以油餅餌之令不誕也細者如針千餘頭共一甌盛之在彼無不活者吳越人接手中卽以漸死若隨接隨入池中又無不活者入池當夾草魚養之草魚食草鱧則食草魚之矢鱧食矢而近其尾則草魚畏癢而遊草遊鱧又隨覓之凡魚遊則尾動定則否故鱧草兩相逐而易肥計然爲十洲三島爲此故草魚亦食馬矢若池邊有馬廐

則不必飼草



益部談資卷上

明 安陸何宇度仁仲著

王逸少生平最愛蜀之山川渴欲一遊與周益州書云
省足下別疏具彼土山川諸奇楊雄蜀都左太冲三
都殊爲不備悉但言此心已馳于彼矣又云吾有七
兒惟一小者未婚過此便得至彼得果此緣一段奇
事又云鹽井火井皆有不峨嵋山夏含霜雹碑板之
所聞崑崙之伯仲也其言不一而足雖雅志未酬千
載之下猶與此中山水爭勝

學海類編 卷之三
逸少帖遊目汶領卽岷嶺用古字也與謝東山書嘉州
舊有石刻今不復存

宋陸務觀范石湖皆作記妙手一有入蜀記一有吳船
記載三峽風物不異丹青圖畫讀之躍然
益州耆舊傳漢陳壽作益州記漢李膺作華陽國志晉
常璩作成都記唐盧求作蜀檣杙宋張唐英作成都
古今集記宋趙抃作續記宋王剛中作蜀鑑宋李文
子作丙丁二記宋范石湖胡長文作夔記本朝郭棐
作諸書僅華陽國志蜀鑑蜀檣杙夔紀有刻餘俱漫

漶久矣

玉壘青城俱在灌縣雪山在茂州峨嵋在嘉定李白讀
書匡山在彰明劍閣在閬中岷嶽在眉州瓦屋在榮
經俱海內名山鼎峙珠聯盈于境內

全蜀藝文志楊用修所編也網羅金石鼎彝秦漢之文
幾盡可謂博矣然惜太繁刻在藩司已不存太平清
話云四川總志惟藝文一卷乃用修所選立例最古
似殊不然豈俱未見二書乎

蜀之山大約近江源者皆謂之岷山峰連岡屬千里不

絕今俗謂青城爲岷山者以此又聞凡稱岷嶓者該
眾山言也凡稱沱潛者該眾水言也蓋蜀山之居左
者皆曰岷居右者皆曰嶓水出于岷者皆謂之江出
於嶓者皆謂之漢或謂之漾或謂之沔出于江而別
流別而復合皆謂之沱出于漢而別流別而復合皆
謂之潛古今論岷嶓沱潛者眾矣參差不一莫得其
真惟由不知左者皆得爲岷右者皆得爲嶓而獨指
茂州之汶山爲岷山金牛之嶓豕爲嶓山隘矣然今
嶓豕又改隸陝西非蜀可得竝論也

蜀之水宋玉象之言之頗悉四瀆惟江最大發于岷逕
夔荆而入于海自蜀而言江之外其水有七出于縣
州者縣水出于什邡者洛水分流于永康者湔水三
水皆合于雒自雒逕懷安簡資富順至瀘與江水會
總曰內水發源于江納逕縣潼東至于合曰涪水發
源於沔逕大安利閬合于涪水曰嘉陵水發源于小
巴嶺逕巴蓬至于渠曰巴水出萬頃地逕與巴水合
曰渠水巴渠二水合而與嘉陵涪水會以達于渝而
江始大若分流出夷中入中國以附于江者有三曰

青衣曰羊山曰馬湖青衣逕洪雅夾江而下羊山逕漢源至嘉定馬湖自夷都流至叙俱與江合而下夔峽惟漢水出岷冢與江分流由漢金趨襄至江夏大別山始與江合而達于海

蜀之文人才士每出皆表儀一代領袖百家漢如楊雄王褒司馬相如唐如陳子昂李白宋如蘇家父子元如虞集豈他方所能比擬然不特此香奩之彥若花藥當壚製箋才情豈在人下

火井邛州蓬溪富順咸有之蜀都賦火井熒於幽泉高焰煽于天陞註曰欲出其火先以家火投之須臾焰出以竹筒盛之其火無灰井有水火取片火煮水一斛得鹽五斗家火然之則鹽減邛州南設有火井巡檢司蓬溪者地窪若池以火引之有聲隱隱出地中少頃炎熾夏月積雨停水則焰生水水上水爲之沸而寒如故秋冬水涸則土上有焰觀者至焚衣裾
油井在嘉州眉州青神井研洪雅犍爲諸縣居人皆用之然燈官長夜行則以竹筒貯而然之一筒可行數里價減常油之半光明無異

茶爲蜀中郡邑常產蒙嶺在名中霧中在大義俱擅古
今名品世又謂峨嵋之味初苦而終甘茶經又云瀘
茶味佳飲之療風若余所見成都之灌縣夔門之開
縣初春所採不減江南

鹽井各州邑多有之大小不一深可數十丈上孔僅杯
盂大用竹作長筒垂下取水而煎曬卽成鹽業此有
成富者亦有家爲之累者隨其所遇然開井祇憑堪
輿家言不知何術得此

大禹史稱生于西羌方輿志謂今石泉縣之石紐村是

其發祥地也山石紐結題有禹穴二字傳爲李太白
所書塗山氏之塗山今在重慶城外卽其后家耳後
因巡狩而南崩于會稽會稽亦有禹穴者乃其葬處
元帝幻身在今中江之雲臺山峰岫逶迤殿宇宏麗乞
靈者踵接另有志可考

文昌帝君傳云降生于越之西雋之南兩郡之間今之
梓潼縣是也志稱祠中刻有帝親筆書自作紫府飛
霞洞記落筆精妙命詞簡遠惜未得覩

許真君名遜洪州人也嘗爲德陽縣令有仙術歲歉點

石化金以濟民今縣治有煉丹井煉丹臺遺跡存焉
卽豫章鐵柱宮所祀者
大峨山者普賢大士道場西竺僧所稱高出五岳秀甲
九州震旦第一山也有蘇稽渡故子瞻讀書處及魏
鶴山陳圖南諸墨蹟石下泉水云與楚玉泉寺通郭
景純賦峨嵋爲泉陽之揭殆是乎歌鳳臺爲昔楚狂
棲隱處中峰寺有孫思邈藥鼎小鳥如鸚鵡鳴曰佛
現向人合掌取食蒼鼠成羣了不避人石徑寸者常
放光日射如虹入蜀不遊此何以稱奇

宋祁有益部方物贊曰海椶曰柑曰橙曰竹柏曰海芋
曰紅豆曰紫竹曰慈竹曰椶竹曰方竹曰柑曰赤鸛
芋曰綠蒲萄曰天師栗曰天仙果曰隈支曰錦被堆
曰錦帶花曰石蟬花曰長生草曰瑞草曰紅蕉花曰
重葉海棠曰月季花曰佛豆添色拒霜花曰黃荼蘼
曰艾子曰鴛鴦草曰娛美人草曰仙人縉曰羞寒花
曰瑞聖花曰七寶花曰旌節花曰娑羅花曰木蓮花
曰鵝毛玉鳳花曰蒟曰眞珠菜曰朝日蓮曰蟬花曰
燭麻曰水硫黃曰附子曰石瓜曰芎曰大黃曰餘甘

子曰金星草曰桐花鳳曰紅桐鶯曰荏雀曰護花鳥
 曰百舌鳥曰狨曰龍羊曰獲曰魴魚曰嘉魚曰鮭魚
 曰黑頭魚曰沙綠魚曰石鼈魚曰金蟲凡六十五種
 武擔山在藩司右西蜀記蜀王開明妃死遣五丁擔土
 為冢而成以是得名史稱昭烈即位于武擔山之南
 即此

楊妃池在灌縣東太真外傳云妃父元炎為蜀州司戶
 妃生蜀嘗誤墜池中故後世池以妃名
 文君井在邛州采蘭雜誌載文君閨中一井文君手汲

則甘香沐浴則滑澤鮮好他人汲之與常井等今白
 鶴驛中之井是也水尚清澈州人釀酒必取之

眉州象耳山舊有李白題石云夜來月下臥醒花影零
 落滿人衣袖疑如濯魄冰壺也真千古佳話
 播州今改遵義府即漢之牂牁唐之夜郎也李白貶于
 此志載流寓以白稱首

簡州逍遙洞有漢碑止十二字云漢安元年四月十八
 日會仙友旁書東漢仙集畱題乃古隸
 資縣有唐顏魯公書中興頌刻于廢寺磨崖上石理甚

粗字半漫滅去碑五里河名唐明渡云明皇駐驛之所

資縣球溪有僧化去今九年矣幻體如生或稱曰活佛或曰乾和尚葉令爲繪圖作詩表之

眉州有蘇長公水坻小像李龍眠畫子由贊雖國初重刻不失古意又有長公馬券刻黃魯直跋及醉翁亭記水調歌頭諸碑皆近代效滁黃鑄者

潼川卽古梓州城外牛頭寺在焉形如伏牛竹樹迢遞不負昔賢稱賞問牛頭之稱山僧指以路旁小石而

州之俗人又刻龍于石俱可笑也山上俯視城郭江流如畫第青山意不盡之句無一碑刻不免是此邦缺事

漢州古廣漢也新都卽楊用修故里宅第不甚宏麗問之遺書僅存一二

杜宇亦曰杜鵑蜀人稱爲望帝魂所化其說前人言之詳矣志稱成都有望帝廟

荔枝叙馬瀘涪合俱出嘉定富順亦有之叙瀘爲上涪合爲次嘉州今止一二株屬之蜀藩華陽國志載漢

宣帝時荔枝開日二千石張具其下邀賓賞之一騎
紅塵妃子笑蓋從棧道入關耳涪舊有妃子園顆最
肥大馬馳七日夜卽抵長安其速如此所謂無人知
是荔枝來也重慶營昌諸處又聞亦有龍眼人言之
白居易爲木蓮荔枝圖各紀其狀曰荔枝生巴峽門樹
形團團如帷蓋葉如桂冬青華如橘春榮實如丹夏
熟朶如蒲桃核如枇杷殼如紅繒膜如紫綃瓤肉潔
白如冰雪漿液甘酸如醴如酪若離本枝一日而色
變二日而香變三日而味變四五日外香味盡去矣

邛竹出邛州之邛崃山卽古臨邛地也漢張騫奉使西
域得高節竹還而植此今人取以爲杖鶴膝者佳又
叙州亦出此竹雅州復有一種名羅漢竹皆爲杖之
具

海棠有色而無香惟嘉州色香竝勝大足治中舊有香
霏閣號曰海棠香國謂杜子美諱母乳名詩中不之
及恐亦宋人傳會

諸葛菜卽古之蔓菁今之紅蘿蔔也武侯謂視諸蔬有
六利四時各食其根莖心葉令軍中所至咸種蜀故

學海類編
九
遊覽
以是名之

蒟醬見于相如揚雄左思諸賦中註云緣木而生其子如桑椹蓋棘道通越雋之地出蒟棘人取以爲醬棘地卽今叙州也問之莫答或云今之雞鬃油及滇中窠葉皆相彷彿晉灼註拘音矩徐廣注拘亦作蒟音窠

蜀檮杌載孟昶十月宴芳林園賞紅梔花乃青城山進三粒子種之而成者其花六出而紅清香如梅今不可得見

傳稱雷威作琴不必皆桐遇大風雪之日酣飲著篔簹獨往峨嵋山深松中聽其聲連延悠揚者伐之斲以爲琴有最愛重者以松雪名之故世稱雷威琴

東川有夷一種名曰棘人烏蒙卽古賓地漢爲牂牁郡鎮雄卽古芒部地天全卽古氏羌地黎州卽古西南夷笮都地漢爲沈黎郡龍安卽古冉驩地松潘亦古氏羌地漢設護羌校尉居此雪嶺在其境內建昌卽古越氏羌雋郡又謂之獠郡其夷又謂之羅羅

西番與蜀相近貢道必由錦城有三歲一至者有一歲

一至者其貢則小鍍金銅佛銅小寶塔彩色小畫佛
銅鐵刀劍盜甲及珊瑚吹噍香舍利子璣璣諸貨也
舍利子止小菘豆大紅紫色用香縣包裹問其俗云
伊國人初生時卽能言前生功果者國王拜爲國師
僧人老死能前知死期而以所餘付後人者國人卽
謂眞佛遂合眾同焚從灰燼中得舍利今來獻貢之
僧皆係中年紅補衣僧帽束五彩軟帶乃伊國之尊
官法師中朝之賜衣也言語不通中華食牛羊肉而
飲酒番物名不一志載惟足力麻鐵力麻璣璣三種

而自蜀人言者有曰細毯工布氎毯絨邊工毯姜納
大貨貼裏縣惟憑粗細顏色定價值

川扇不知起自何時然李德俗有畫桐華鳳扇賦云未
若繪茲禽于素扇動涼風于羅薦則唐時此地已嘗
製之矣竹本蜀所富有第不甚堅厚紙則出嘉州彭
縣輕細柔薄惟可製扇是其來已非一日欲不充貢
得乎

諸葛鼓乃銅鑄者其形圓上寬而中束下則敞口大約
若今楂斗之倒置也面有四水獸四周有細花紋其

色不甚碧綠擊之彭彭有聲如鼓云置于水擊之其聲更鉅

長腰鼓卽古之蜡鼓也長七八尺以木爲桶腰用篾束二三道塗以土泥兩頭用皮幪之三四人橫擡扛擊州郡獻春及田閒秧種時農夫皆擊此復雜以巴渝之曲

熊之爲物多係獸形諸深山中人跡罕到處皆有之力能食虎其皮色黑而大勝于虎掌味固佳然聞身之味亦不減

道書載中國名山青城峨嵋爲西嶽佐理又三佐命山及十大洞天皆有青城而福地七十二則巫山臨邛平都在其列

青城山唐杜光庭記岷山連峰接岫千里不絕青城乃第一峰也山有七十二小洞八大洞道書以爲第五洞天神仙都會之處

八陣圖有三處一在新都牟彌鎮一百二十有八當頭陣法也一在夔州六十有四方陣法也一在碁盤市二百五十有六下營法也

學海類編 卷之三 遊覽
劍閣兩崖峻拔鑿石架閣而爲棧道秦司馬錯由此伐

蜀

籌筆驛在廣元武侯出師嘗駐于此唐李義山詩云魚
鳥猶疑畏簡書風雲長爲護儲胥徒令上將揮神筆
終見降王走傳車此其地也

石繖在安廣石船在大竹俱江中皆以形名

聖燈蓬山者爲最初出三四點漸至數十點高下相應
離合不常未知何物

虎豹此邦常產其鞞艾葉金錢爲佳然聞有銀邊金錢

者羊名蟠者其角年久而蟠皮可坐數人羚羊皮毛
色青兵中臥之有警則自動天狗皮毛純白嚴寒坐
臥之處雪爲不積皆出諸夷山中

火浣布不朽木俱出于建昌夷中其布卽取此木之絲
而成焚之然而無灰炤過仍還故物

兔之白者自是一種安縣閒有攜至會城者予因憶向
年家食曾于沔州費兵憲處見有三小白鹿云自關
中攜歸身白而目紅儼如圖畫中所繪豈凡物皆有
白色特未之多見乎

學海類編 卷之三 遊覽
鯢魚一名鮒一名鯢出滎經河中大首長尾而有四足
能援樹攀木聲作兒啼土人皆食之

雪蛆產于岷峨深澗中積雪春夏不消而成者其形如
蝟但無刺肥白長五六寸腹中惟水身能申縮取而
食之須在旦夕否則化矣

香豬土犬建昌松潘俱出香豬小而肥肉頗香入冬醃
以餽人土犬亦小而肥美羣遊稻田一犬登樹而望
如有捕者則先鳴吠令眾犬奔逸

黃庭堅嘗謫涪州守因自號曰涪翁李白嘗避難過涪
州故今鎮名曰李渡

中巖諸詎那尊者道場離青神南五里寺臨江干有水
月閣下更逼江水喚魚池在巖石下小魚百十頭僧
拍手始集三石筍從地而起石逕高峻宛曲泉從兩
山而下頗盡林壑之美

凌雲山與嘉州對岸石壁鐫千佛內彌勒像首攢峰頂
趾齧江水高三百六十尺唐韋皋所造寺之殿閣磴
道依山盤曲前望峨嵋三峰下俯眉雅諸水真江山
輻輳處也寺左有蘇長公墨池著書堂長公云天下

學海類編 卷之三
山水在蜀蜀之山水在嘉嘉之山水在凌雲

蜀中水陸舟車所經凡有巖石莫不鐫佛像豈地近西番前代風氣湔染如此

保甯郡治前對翠屏山江流環遶其下闐闐殷富北川奧區也張桓侯墓卽在治旁廟宇巍峩郡人咸嚴事之出郭而西經槐樹施店柏林圓山龍潭五驛始抵廣元重岡複嶺道路縣邈行者苦之關曰二郎曰柏曰梅皆極險峻擅登青天之譽

廣元卽利州古之葭萌也出郭數里石壁臨江鑄大小佛像幾滿非近代物車馬遶岸而行下視深潭毛爲之豎宛然又一巫峽也

廣元而西經河沙神宣黃垠三驛始出蜀境巖嶺斗削四無人煙行者如臨絕境視之歸巫道路僅讓一籌七盤嶺乃秦蜀分界處一峰插天萬石羅列中開一綫之道而下俯絕淵誦岑嘉州杜工部之句不覺七盤日月飛動

蜀中諸郡天氣不一重夔四面皆山城基少土冬雖不寒夏則最熱六七月閒裸體終日曠曠如醉夢中夜

寢汗透枕簟惟錦城隆冬時或揮扇夏夜閒覆單衾
乃四時陰多晴少數郡皆同每誦子美蜀星陰見少
江雨夜聞多感嘆此老信是詩史

松潘去省不旬日聞彼中最寒臥室之內冬必爨火重
裘盛夏一雨卽擁絮炙炭蓋近西北地氣使然

蜀江界兩山閒卽風亦無波舟且不篷奈何禍常不測
予日擊之始得其故蓋灘急水駛怪石林立舟薄而
載重長年每倩客爲之突然遇石鮮不齧粉是以絕
無顛覆惟有沈溺患生于頃刻無事時非如大江風

波可以閃避也誠能反是安得有虞

出師表五月渡瀘以水色黑得名今之金沙江是也滇
蜀之交一在武定之南一在姚安之左

益部談資卷中
成都一名錦城一名錦官城秦張儀所築有大城少城
子城三區後始改合附郭縣二曰成都曰華陽華陽
古國名也

益部談資卷中

明安陸何宇度仁仲著

成都一名錦城一名錦官城秦張儀所築有大城少城
子城三區後始改合附郭縣二曰成都曰華陽華陽
古國名也

成都城外皆平壤竹樹蒼蔚田地膏腴江河諸流交錯
貫絡昔稱天府沃野信非虛語

江從灌口來夏秋水漲闊盈里許冬春水涸如帶邦人
或以河名之

錦城又名芙蓉城昔蜀孟昶僭擬宮苑城上盡種芙蓉謂左右曰真錦城也後世因之亦種芙蓉于上有直指登城不便輿從命稍芟之軍卒因盡蒐去

東南角樓榜曰芙蓉樓名雖佳規製不甚鉅麗宴會亦不恆到

西南角樓榜曰錦江春色俯視江河諸流青羊浣溪諸處景物差勝

環城爲橋者四曰駟馬卽相如題柱處舊昇仙也南曰萬里取孔明送費禕聘吳曰萬里之行始于此之義

東曰錦濯西曰浣花名皆古雅可誦

唐史載元宗狩蜀至萬里橋問橋名左右對以萬里元宗歎曰開元末僧一行謂更二十年國有難朕當遠遊至萬里之外此是也遂駐蹕成都

文翁禮殿今學宮卽其故址云漢文翁立學作石室繪三皇五帝仲尼七十二賢及兩漢君臣像于其中祀之至唐已漫滅宋嘉祐中重爲摹寫增至一百七十人今學宮止有孔門諸弟子石刻不知仍是故物否其餘不可見矣因錄其姓名

盤古 伏羲 神農 蒼頡 沮誦 黃帝 少昊

高陽 祝融 高辛 堯 舜 禹 咎繇 稷

契 伯夷 夔 湯 伊尹 高宗 傅說 太

王 王季 太伯 文王 太顛 閔天 散宜生

南宮括 武王 太公 周公 成王 召公

仲山甫 宣王 管仲 子產 李冰 老子 蕭

何 張良 叔孫通 陸賈 漢文帝 賈誼 文

翁 漢武帝 董仲舒 公孫宏 倪寬 司馬相

如 王吉 蕭奮 勝戴 匡衡 王尊 李疆

莊君平 劉向 楊雄 漢光武 鄧禹 張堪

張湛 桓溫 劉平 鍾興 第五倫 廉范 班

固 黃昌 种暘 馬融 李膺 高鎮 陳寔

服虔 陳紀 鄭元 諸葛亮 龐統 董和 費

詩 譙周 鍾繇 王肅 羊祜 張華 杜預

王濬 夏侯湛 喬智明 范廣 謝安 桓石虔

蜀錦之名其來久矣城名錦官江名濯錦而蜀都賦云

具錦斐成濯色江波遊蜀記云成都有九壁村出美

錦歲充貢宋朝歲輸上供轉運給其費府掌其事元

學海類編 卷之三 遊覽
豐中建錦院歲募軍匠五百人其錦之名凡三十餘種今惟蜀藩製之名無多而價甚昂不可易得

蜀箋古已有名至唐而後盛至薛濤而後精據譜云箋之名不一有曰玉版曰表光曰貢余曰經屑或布紋或綾綺文或人物花木蟲魚鼎彝文唐韓浦詩云十樣鸞箋出益州寄來新自浣溪頭則又倍多于濤製更有小而僅可書一詩者乃今蜀藩所造僅純白一種清瑩光細長餘五六尺寬僅三二尺亦無諸花紋遠讓古昔多矣

十箋者曰深紅曰粉紅曰杏紅曰明黃曰深青曰淺青曰深綠曰淺綠曰銅綠曰淺雲又有松花金流沙彩霞金粉桃花冷金之別皆其異名

史載王衍以霞光箋五百幅賜金堂今張蠊霞光卽深紅箋也又有百韻箋以其幅長可寫百韻詩其次學士箋比百韻較短何今日輒無一種

漢昭烈帝惠陵去城南五里古冢巍然石碑僅未斷傍卽昭烈廟頗壯麗用武侯諸將配享前有穹碑以亭覆之乃唐之裴度記柳公綽書也會城古碑僅有此

學海類編 卷之六 遊覽
四
子謂衢口當樹一坊名曰漢昭烈陵廟嘗請之當道未果

楊雄舊宅在府治西成都縣治其舊址也今藩司前有墨池草元亭在焉誦岑參詩吾悲子雲居寔寂人已去娟娟西江月猶照草元處爲之悵然宋米芾有墨池碑字

子雲家貧嗜酒問字者多載酒而往清賞錄載昔有犍爲人得雄草元之硯如今製但去圭角

王褒宅在資陽墓在資縣舊碑剝落不堪讀李白宅在彰明聞有碑刻在焉

花藥夫人宅在灌縣夫人姓費氏青城人以賦宮詞百首著名全蜀藝文志仍載有遺詩百首是楊用修收者

嚴君平墓在新都有碑樹于道傍賣卜之肆在省城漢明帝諱莊故史記改莊爲嚴以莊與嚴古同義

武侯祠在城西浣花谿上與子美草堂相接廟貌雖未頽壞森森之柏則不復存

相如宅在城西南五里又云在市橋西今琴臺去城西

五里豈非其處乎秀柏參差當壚滌器風流宛可想見

傳謂相如死文君爲作誄是文君豈徒以色稱者

支機石在城西隅卽嚴真觀今以一亭覆之高不盈丈頑石無他奇晉張華博物志有人居海上乘槎到天河得一石歸以問嚴君平今蜀人相傳卽此

子美石筍行云在成都西門陌上按志有二株雙蹲一南一北南者高于北以公孫時嘗折也今徧問故老于西門外竟無有也豈後又盡被折去耶

城南市名五塊石有大石五片疊疊其上云石下有海眼豈卽石筍年久傾斷置此乎又云五丁所置下有海眼

青羊宮在城西南竹樹青葱殿宇宏麗宴會多往焉昔老聃謂關令尹喜曰後于青羊肆相尋卽此地

杜少陵勝國時加謚文貞祠在浣花溪上云卽草堂舊址人多以草堂呼之祠後堂匾陳方伯塗書卽萬里橋西一草堂棟宇尙未傾圮蓋監司郡邑常宴會處予稍爲之修葺鑄公遺像及唐本傳于石榜署皆用

公詩而隲括之曰背郭堂成錦里溪山千古在綠江路熟青郊竹樹四時新又萬丈光芒信有文章驚海內千年豔慕猶勞車馬駐江干又萬里橋西草堂佳句如新宛見卜居之興百花潭上水檻蒼波依舊長畱懷古之思不知堪博此公捧腹否

浣花溪中一洲橫出下卽百花潭也舊有洲上亭一跨水橋亭一名皆無謂予易以浮槎滄浪二榜及增益竹樹于上子美有靈當亦稱快

武侯工部二祠之中有寺一名草堂一名中寺前代爲尼居名桃花寺隋文帝時始易以僧大歷中崔甯鎮蜀以冀國夫人任氏本浣花女遂重修之繪任氏真于其中會昌中欲毀寺夜聞女子啼泣之聲中止已而禱雨有驗本朝賜名梵安寺

百花潭口舊有任氏一碑立于風雨中予令人滌去苔蘚讀之乃宋熙甯年間吳中復撰八分書也字半漫滅略可成誦知夫人微時見一僧墜汚渠爲濯其衣百花湧出因而名其潭後杜少陵薛濤皆買居潭側薛濤唐之青樓人也其詩云聞道邊城苦于今到始知

好將塞下曲唱與隴頭兒濤本長安良家女父卒于蜀失身爲妓晚歲住居碧雞坊王建贈詩云萬里橋邊女校書枇杷花裏閉門居掃眉才子知多少管領春風總不如墓在江干碑題唐女校書薛宏度墓宏名度蓋濤小字云卒時年七十三段文昌爲撰志銘一時名士如韋皋李德裕元稹白居易裴度杜牧劉禹錫張祐咸與之唱和

薛濤井舊名玉女津在錦江南岸水極清澈石欄周環久屬蜀藩爲製箋處有堂室數楹令卒守之每年定

期命匠製紙用以爲入京表疏市無貿者

石犀寺俗稱曰石牛寺華陽國志云

年閒建今佛

殿之前有一大石其形如犀殿中又有水眼如井云其水與海通有太和年閒馬季武寫經石幢

射洪祠在北門外驛傍傳云蜀獻王初之國夢有神冠冕來謁者王問爲誰對曰陳子昂也今爲射洪土神王駕過護送至此王因其地立祠祀之世因謂子昂爲蜀土神

大慈寺唐至德年建舊有元宗書大聖慈寺四字寶光

寺卽故興福寺亦創自唐時惜皆無舊碑可考

東坡云古今畫水多作平遠細皺其善者不過能爲波頭起伏唐處士孫位始出新意盡水之變號稱神逸其後蜀人黃筌孫知微皆得其筆法嘗于大慈寺四壁作輸瀉跳蹙之勢洶洶若崩岸也知微死畫法中絕今大慈寺故在也四壁安能復覩

桐花鳳志稱成都春日桐花開時有鳥小而具五色如鳳形盤旋樹上桐花謝莫知所之問之郡人亦不多見

鸚鵡成都甚多梁山諸縣亦有之春時飛鳴如陣每過浣谿樹下停車側耳者久之

楊梅蜀藩夏日相餽亦鹽水浸者顆味俱讓吳下醪醱花志載惟成都最佳予見三種曰白玉盃曰出爐銀曰雲南紅色香俱美可敵南中黃薔薇

牡丹諸色俱備千葉而大如毬兩都所不及也一名魚血紅者獨豔惟無黃者

山茶有雲南紅石榴紅謝萬定數種朶大勝芍藥重瓣如芙蓉土人自能接他處所莫匹也寶珠雖有又拜

下風矣

素馨紅者白者俱奇品紅開于春白開于秋桂之丹者色亦甲于南中茉莉枝如藤花瓣稍大山蘭四季有花香氣襲人又有一種葉稍大紅黃白三色而窮冬新正盛開名曰蟬花則尤異也

賽蘭香葉如菀豆開花似粟香亦清遠此中人甚愛重然云蘭爲所賽似未必然楊用修伊蘭賦謂不足于豔而有餘于香載之髮紒經句猶馨古人用紉佩類浴西番有伊蒲佛供卽是此花

郫筒酒乃郫人剗大竹爲筒貯春釀于中相山濤治傳郫用筠管釀醪醱作酒經旬方開香聞百步今其製不傳

檜木籠竹惟成都最多江干村畔蒼蔚可愛每見必誦杜甫礙月吟風之句第檜字音欺不見字書

金馬碧雞祠在北門內金馬坊側漢宣帝聞益州有金馬碧雞之神遣諫議大夫王褒醮祭此宋賜廟額曰昭應今仍稱金馬云

蠶叢祠在府治西南蠶叢初爲蜀侯後稱王教民桑蠶

蜀人至今德之

八蜡祠在城東南隅有司春秋致祭八蜡神者先穡先農司穡郵表啜貓虎坊水庸也

宋景濂國初仕學士致政歸青蘿山因其孫以罪被刑安置公茂州子瓚隨侍之蜀閒關萬里卒于夔門瓚與家人皆相繼而歿蜀獻王憐之移葬于成都之東郊卽今之淨居寺也祠廟宏整有司歲舉祀焉其遺裔尙有存者方孝孺嘗應蜀藩聘至因竝立祠于左仙宮佛院成都頗盛半創自獻王之國時累代藩封中

貴從而增益之殿宇廊廡華麗高敞觀如元天雲臺

寺如昭覺金像淨居淨因

俗名福萬

金沙廟如昭烈宮如

青羊俱不減兩都規模足供遊眺

諸寺閒藏有佛牙甚至重七斤餘者錦袂宋匣珍襲嚴祀余頗疑之偶檢本草豹之齒骨極堅人得之詐爲佛牙以誑俗爲之爽然自失此可以一洗蜀僧之陋楊用修著述之富古今罕儔予所見已刻者二十九種

升庵全集升庵詩集升庵詩話楊子卮言赤牘清裁詞林萬選丹鉛要錄丹鉛總錄舟鉛摘錄丹鉛餘錄

丹鉛續錄藝林伐山墨池瑣錄詩話補遺五言律祖
絕句辨體禪林鉤元水經古文韻語轉註古音略古
音駢字古奇複字古音附錄異魚圖贊韻林原訓李
詩選杜詩選風雅遺編皇明詩抄未見已刻者三十
九種南中續集玉堂集長短句長短句續集書品詞
品金石古文畫跋赤牘拾遺選詩外編選詩拾遺唐
絕精選唐音百絕唐絕增奇六言詩選古文音釋古
音獵要古音叢目奇字韻古文參同契溫泉詩集洞
天元紀檀弓叢訓禪藻集譚苑醜酗陶情樂府樂府

續集筌篌新詠堦戶錄滇載記脈位圖說連夜吟卷
月節詞千里面談經義模範崔氏志銘山海經補註
七十行戍藁聞未刻者尙有七十一種各史要語晉
史精語夏小正解管子敘錄莊子刊誤古雋謝華啓
秀羣書麗句文海鈞鼇名奏箐英四詩表證古文韻
語別錄古文詩選皇明詩續抄詩林振秀五言絕選
選唐百絕寰中秀句古今柳詩古諺古今風謠蒼珥
紀遊填詞選格百琲明珠詞苑增奇草堂詩餘補遺
六書傳證六書探頤篆韻索隱古篆要略六書統摘

要錄駢銘心神品韻藻晞錢瓚筆清暑錄希姓錄滇
程紀書畫名跋書畫神品目素問糾略羣豔傳神江
花品藻滇候記引書晶托丹鉛別錄丹鉛閨錄丹鉛
贅錄升庵經說文遊餘錄卮言閨錄敝帚病榻手吹
蘇黃詩髓宛陵六一詩選五言三韻詩選五言別選
宋詩選元詩選羣公四六節文古韻詩略說文先訓
古今詞英填詞玉屑六書練證逸古編經書指要唐
史要偶語六書索隱總之一百四十種

用修之夫人能詩其一律一詞已載之王元美藝苑卮

言矣今從伊里人更得數首曰珠淚紛紛滴硯池斷
腸忍寫斷腸詩自從那日同攜手直到而今懶畫眉
無藥可療長夜恨有錢難買少年時殷勤囑付春山
鳥早向江南勸客歸又懶把音書寄日邊別離經歲
又經年郎君自是無歸意何處春山不杜鵑又丈夫
本是四方客妾爲離愁心似結公義私情不兩全願
君早向凌煙勒又聞道滇南花草鮮輸君日日醉花
前銀河若得鳩毛渡竝駕仙舟聽採蓮又纔經賞月
時又是菊花期歲月看流水人生遠別離

學海類編 卷中 遊覽
武侯祠壁閒嵌小碑上鐫繪像衣冠甚古雅題云丁黼
字文伯石埭人也宋嘉定初進士有詩名以忤史彌
遠出帥成都賦錢入國詩曰正是朔風吹雪初行滕
結束問征途不能刺刺對婢子已是昂昂真丈夫常
惠舊曾隨屬國烏孫今亦病匈奴不知漢節歸何日
準擬殷勤說汴都元人入蜀公不屈死之事聞詔謚
恭愍賜廟號溪有司春秋致祀字畫適逸可愛立此
石者名吳本義不知何許人

長樂花枝葉皆如虎耳草秋後叢生益益開開紫色小
花冬末轉盛鮮麗可愛居人獻歲以此爲餽名曰時
花

任氏墓碑予嘗搜之荆棘中近見稗史載任氏者唐之
尚書侯繼圖妻也侯讀書大慈寺因秋風起拾得一
桐葉有詩在上貯之匣中後數年方卜任氏爲妻任
見而驚曰此妾書葉詩胡爲在君手詩曰拭翠斂娥
眉鬱鬱心中事擗管下庭除書成相思字此字不書
石此字不書紙書在桐葉上願遂秋風起天下有心
人盡解相思死天下負心人不識相思字有心與負

學海類編
心不知落何地

益部談資卷下

明 安陸何字度仁仲著

蜀道難自古記之梁簡文帝詩云巫山七百里巴水紆
回曲爲川東舟行峽中作也李白詩云不與秦塞通
雲烟爲川北棧道作也大都蜀道無不難如上青天
者峽固險矣而陸亦匪夷如夷陵至巴東之陸程則
視棧道何異是其難又在楚不在蜀耳

過巴東一日始抵蜀界沿江而行險覺稍減巫山十二
峰從輿人指點微見一二遠插天外

楚入蜀縣首爲巫山倚山俯江官民高下而居江口有神女廟荒蕪不治乃有司新移置者舊廟在江干離縣十里聞亦頽廢予令人蹋古碑無有也宋玉高唐賦想隨襄王之夢逝矣

楚宮僅存遺址在巫山西北楚襄王所遊之地也黃山谷楚宮詩刻所謂細腰宮卽此今竟覓不可得

巫峽卽巫山也與西陵峽歸州峽竝稱三峽連山七百里非亭午夜分不見日月水經云杜宇所鑿以通江水圖經云抗峰岷峨偕嶺衡岳凝結翼附竝出青雲

盛宏之荊州記云三峽中兩岸連山略無闕處重巖疊嶂隱天蔽日杜修可峽程記云三峽謂明月峽巫山峽廣澤峽其瞿塘灩澦之類不係三峽數

趙文敏手書十二巫峰詞昔刻于巫山縣令尹厭其來索之煩麾去予僅于士夫家見之

陽臺在巫山城內山頂山不甚高臺正平坻荒烟野草襄王神女不知何在

三峽猿聲古人題詠極富予未舟行不及聞訊之馬元赤云峽中兩岸最多或三五爲偶或百數十爲羣沿

崖援樹不可勝數惟亦未聞啼聲

竹枝歌唐劉禹錫白居易皆嘗賦之凄婉悲怨蘇長公云有楚人哀屈弔賈之遺聲焉鶴林玉露載宋時三峽長年猶能歌之今則亡矣

夔卽古夔子國宋王梅溪舊治也四圍皆高山峻嶺中橫江流一對江之山左爲赤甲右爲白鹽

巫山女子皆善吹簫嫁時眾女子治具送之吹簫數日爲樂蜀中有此母乃神女之遺風乎

魚復卽夔地謂鯉魚至此復回不上也對城隔江有魚

復縣故址

白帝城離夔東五里崇山巍然另作一城狀下卽西陵峽口大江橫流瀟騰澎湃真楚蜀咽喉也本朝設右所官兵守焉

城上舊建公孫述廟後改漢先帝廟以武侯關張配享綽楔題曰漢代明良廟後復有僧寺一區宋陸務觀記云有古松柏及孟蜀時碑與黃庭堅題石筍越公堂俱無一存自關而東卽子美東屯故居矣

瞿塘卽峽內江水深沈處灩澦乃一石筍樹兩峽之中

若青螺寶劍插于鏡中波面上下之險信無逾此俱在白帝城下

灩澦大如象瞿塘不可上灩澦大如馬瞿峽不可下又云灩澦大如襍瞿塘不可觸舟人以為水候總之夏秋不可行也

峽口鐵柱二不知是何代物上鑄守關大將軍徐宗武等字

峽口石上字多磨滅惟一詩云白帝城邊春草生黃牛峽裏水波清追思昭烈千年事長使英雄氣不平後

書大元至元十九年歲次壬午鎮國上將軍四川宣慰使何公同男到此吟而已

諸葛八陣磧在夔城者江沙上碎石行列如引繩春冬時見夏秋没于水然江漲即浮磧上數十丈比退而陣石如故子美詩有江流石不轉之句

夔城無井官府軍民咸取汲于江雖治井亦不能貯水府治後僅有一泉自山巔流下四時不竭因而引入治內鑿池以貯之亦不能多分別派

夔蓋蜀東門戶然登後山城中不一覽殆盡前即逼近

江流域內薪水皆仰給城外不知前人何以爲守
夔郡縣皆屬蜀而衛名瞿塘則屬楚國朝犬牙之製如
此

白帝城上僅元人一碑亦不甚佳餘皆今人詩字

杜工部祠在郡東數里倚山俯江云亦新創祠中止塑
像其秋興八詩近代雖有刻字殊不佳餘無足觀者
予置碑二一刻公像及史傳樹祠中一大書唐杜工
部遊寓處樹道旁

工部舊日草堂在城東十餘里外尙有遺址可尋止一

碑存數字題重修東屯草堂記似亦元物

城西開元寺唐了休禪師道場也國初張三事與僧廣
海善寓于寺者七日臨別贈詩云深入淨屠斷世情
奢摩他行恰相應天花隱隱呈微瑞風葉琅琅詠大
乘密室晝閒雲作蓋空亭夜靜月爲燈魂銷影散無
何有到此誰能見老僧竝畱草履一雙沈香三片而
去後海以詩及二物獻之

文皇答賜玉環一枚千佛袈裟一領今猶置寺中稱世
寶云解學士縉有寺中法堂記碑

先主永安宮遺址卽今之學宮先主所崩處也諸葛武侯受遺命于此

甘夫人墓在府治內後山前有二碑字似被近世更改吏卒皆能指點道之

子美遊蜀凡八稔自大歷元年春至夔大歷三年去而之楚寓夔之東屯西灤者凡三年得詩四百餘首

灤者土人謂山閒通江之流曰灤

夔譙樓上柱聯卽當用杜詩五更鼓角聲悲壯三峽星河動影搖何等壯麗俗人因諱悲字置之

志稱有詩史堂刻杜工部遺像又有萬丈堂取光焰萬丈之義俱在府治內今不可考

郡齋望隔江羣山尺咫七峰分列若屏朝暮之閒翠色撲人衣袂予因取杜句翠屏名署中小齋

夔之香椽大而香爲閩浙所無亦有獅頭柑佛手柑皆可玩

雲陽縣卽古雲安也酒未見佳纔傾一盞卽薰人之句每過高誦數迴

雲陽對江山上有張桓侯廟香火頗盛傳云侯之首葬

此官舟過縣必設牲醴望祀之

萬縣本漢朐腮縣地隔江有岑公洞寬敞如庭室中有石狀如芝儼人爲者壁上多前代題識洞前石碑林立惟黃山谷楷書一通學顏體甚佳岑公唐人也爲仙化去

出城渡河有巨石亘生水而呼曰天生橋又曰天仙橋石橫百丈寬數十丈平坦如削下有飛瀑崩騰如萬馬之聲過之毛豎予語越尹當建二坊標其勝尙未就

丙穴在達州出嘉魚杜工部詩云魚知丙穴由來美是也志又載雅州亦有丙穴

梁山亦漢朐腮縣地東九十里有泉自山頂下注東坡昔以飛練名其亭嘉靖閒守臣獻白兔至此而斃瘞之因更建亭宇故今稱之曰白兔亭行山路旣疲坐聽飛泉百丈十里聲不絕誠長途一快事勝覽也又聞山上有洞惜未及登

黃葛樹葉似桂稍大團欒蔭數畝冬春不凋榦則臃腫根皆蟠露土上至于石崖之側則全似不藉土生者

學海類編 卷之三
夔之梁萬最多惜無材用

竹腳太平東鄉皆有之生于竹中之鼠也形色俱類鼠
差大而肥烹之味與黃鼠無異

郭公棐嘗梓夔門三傳名宦則諸葛亮李靖源乾曜韋
處厚唐介虞允文王十朋李浩查籥劉光祖余應求
孟珙鄉賢則屈原李遠廖彥正楊晨袁沔青文勝汪
瀚柳英流寓則宋玉杜甫李白寇準張俞邵雍黃魯
直宋濂惟武侯工部王梅溪有特祠祀之

何仁仲辭賦之業士林聲稱籍甚而不悉其有政事
材浮沈兩都散署十許年僅得判夔府當事者一切
盤錯輒屬仁仲應時批解飭篋篋而遠苞苴人皆嚴
重之居夔僅數月督府置諸幕下使佐成都守攝華
陽令其最不易辦者爲貢筭仁仲費省而事集兩臺
及監司予上考而銓曹漫然用左官律監之余使使
訊仁仲仲遺一編書曰益部談資君望我意氣乎臺
中裝盡是矣余發視之則皆蜀故實山川人物之勝
瞭然指掌應接不暇而時吐致語靡靡可聽余調仁

仲不聞沈休文之戲朱彥和耶年少何乃不廉天下
唯文義棊書一時將去仁仲以詞客兼吏事名是爲
妬媒宦蜀三年遂括蜀千古之美英英斑管纍纍錦
囊又何得不左官人傳仁仲入都面詰銓曹左官坐
何狀曰不當以辭翰內交仁仲言能爲辭翰者內交
我耳非我交人曰貲郎何必辭翰仁仲失笑此自蜀
人司馬長卿作僮夫以辭翰內交孰與以賄信如所
云長安輦上貴人必不識一丁者耶長揖而出此語
殊可爲談資附之以資談者南新市人李維禎本甯

甫誤

學海類編

卷

九

遊覽

